

**MATERA ANJA WAKITÀ
UWANA POL
ATSETSER À AZLA
KORINTIYA
Première Lettre de Paul aux
Corinthiens**

Ayyi

¹ Gi Pol uwana Zəzagəla akəsàni gi, la ma-woyəŋ anha, kà gi anja magay masləlay anja Yesu Kristu, gətsetser wakità uwanay la ahəl gulo la slaka gə, anu la Sostenus, deda gami.

² Mətsetseray kà akul azlaməna masla gay Zəzagəla, uwana la Korintiya, azlauwana matsa-tsamani atə gə, kà atə anja madz à ahəŋ kà ahəl anja Zəzagəla Baba, ŋgaha uwana azlaanə la Yesu Kristu la abà, ŋgaha azlauwana tatsəl sləm anja Sufəl gami Yesu Kristu à gay gesina, uwana Sufəl gami babay suwan.

³ Zəzagəla Baba gami, la Sufəl Yesu Kristu tapis à akul à gay à vok la mav à akul lapiya.

Tatak dzəba anha səla aw gə, uwana tabəzal la Korintiya

⁴ Kikay gəgod à Zəzagəla gulo koksikoksi lakəl ankul, kà vok mahamay uwana avà à akul la Yesu Kristu la abà.

⁵ Ama la maham gay à vok ankul la abà la Yesu Kristu, kabəzəw à gəl la azlatatak delga delga gə uwana la abà, tavà à akul gesina, hafay, la

azlamavày aña tatak, aña gay aña, ñgaha la masəlay aña gesina.

⁶ Ndzer, gay lakəl aña Kristu uwana tazàñ kà, adàla slilih la akul la abà.

⁷ Kà uwaga mavày aña Zəzagəla gesina kabəzəwwal, akul uwana kakudaw kaslà mas à wañ aña Sufəl gami Yesu Kristu.

⁸ Masla kà aga la ahəñ azlaka akul, kà akul magay matsizl à ahəñ gə tsərəh à mavakay uwatà, kà dza aña mabəz tetəvi aña masləh akul à vok, la vudf seriya aña aw.

⁹ Zəzagəla la gəl aña, la uwana azalà akul, kà akul magay tekula la Kona aña la abà, Yesu Kristu, Sufəl gami. Zəzagəla la uwana dziriga.

Mavàhla la tataka azlaməna madiñal gəl à vok

¹⁰ Azladedə gulo, gədəv à akul kuɖa la sləm aña Sufəl gami Yesu Kristu: Dzàw à ahəñ la matsən vok gay la abà, mavàhla apaka vok la tataka añkul la abà aw, gəw la maham gay à vok la abà, la madzugway tekula la abà ñgaha la pañaw tekula.

¹¹ Azladedə gulo, gəpəh à akul kiya uwanay kà, kà uwana azlaməna huɖ gəy aña Kəlowe, misga, tasà à wañ kà mapəh à gi kà magazlay la ahəñ la tataka añkul la abà, tagòɖ à gi.

¹² Uwana gəpəh à akul uwanay kà, kà uwana kəla uwabeyuwi añkul kà, apəhay kà pañaw gərgər. Anik agod: ‘Gi aña Pol’, anik: ‘Gi aña Apolos’, anik aya: ‘Gi aña Piyer’, ñgaha anik aya: ‘Gi aña Kristu’.

¹³ Nğaha ma, kadzugwaw ma, vok aña Kristu ma aslaha vok ala gərgər dən, kagodaw takay? Awma Pol la uwana aməts à ahàf à adi kà ankul takay? Awma tadahàkulla batem la sləm aña Pol kəla ay?

¹⁴ Kay, kikay gəgoday à Zəzagəla, kà uwana gədahà batem à dza aw, say Kirəspus atà la Gayyus pəra.

¹⁵ Nğaha à dza agədiŋ à afik kà adahà batem la sləm gulo aw.

¹⁶ Iyay, haday təga, avikà gi, gədahà batem à huf gày aña Estefanas təga, ama gədahàn à dza anik aya, gəl agod à gi aw.

¹⁷ Ama gi kà, Zəzagəla asləl gi à waŋ kà madàh batem aw, asləl gi à waŋ kà maz gay marabəŋ, ŋgaha gəzəŋ kà la kokudfa haŋkəli aña sləb vok, ŋgaha gi aña mapəsew mamətsay aña Kristu la ahàf à adi aw.

Ndzəfa aña Zəzagəla la matsihila aŋha

¹⁸ Gay lakəl aña maməts à ahàf à adi aña Kristu apakà bokuba tatak deyday la huma yewdi aña azladza, uwana takəs tetəvi aña gày akəl. Ama kà aŋami uwana Zəzagəla abəl anu kà, məsəl kà gay uwaga kà la ndzəfa aña Zəzagəla.

¹⁹ Bokuba uwana tatsetsər à wakità Zəzagəla à abà, agod kà: “Gədakalàh haŋkəli aña azlaməna masəl tatak à ahəŋ, gədawits masəlay aña azlaməna matsihila ala.”☆

²⁰ Tsa kiya uwaga ma, mana azlaməna haŋkəli tapəhay aya zlà ma? Baŋaw azladza mawur gəl gà, la azlaməna mats gay la gudəŋ uwanay la

☆ **1:19 1.19** Yesayya 29.14

vok ma? Zəzagəla apəhla ala kà, masəlay aña gudəñ à vok uwanay kà magay kusoñu.✧

²¹ Azladza gudəñ à vok la hañkəli, tanəña tatak uwana Zəzagəla adəhəñ la matsihila aña, ama tasəl masla aw. Gay gə la uwaga à uwana, Zəzagəla adəhla sləray la azlagay uwana məpəhay, kà uwana atə tagod kà: “Uwanay kà azlatatak kusoñu gə pəra.” Zəzagəla akəs kà uwaga kà, məbəl azlauwana tadiñ gəl à masla à vok.

²² Azla Yahudiya kà, asa à atə manəñ azlanadzipo, ɲgaha kà atə aña masəlay kà sayda gami kà dziriga. Azla Gərək kà, tayəh kà atə masəl Zəzagəla la aslasl gəl añaatə.

²³ Kà añaami kà, məziñ kà lakəl aña Yesu Kristu uwana tazləl à ahəf à adi. Baña azla Yahudiya tatsən uwaga kà, azin à atə à gəl, ɲgaha azladza anik kà tagod: “Kà gay kusoñu!”

²⁴ Ama azladza uwana Zəzagəla atsatsəmənì atə, kà atə aña magay azlaaña kà, amiyaka tadagay azla Yahudiya, amiyaka tadagay azlatsəhay azla Yahudiya aw bay, kà añaatə kà, gay uwanay kà gay deyday aw, kà uwana tasəl kà Yesu Kristu kà apəhla ndzəda aña Zəzagəla la matsihila aña ala babay.

²⁵ Azlaanik tagod kà, uwana Zəzagəla adəhəñ kà kusoñu, ama tasəl kà kusoñu uwaga aduwa hañkəli aña dza la kaykay aw. Tadzugw kà guɓguɓ uwaga aduwa ndzəda añaatə la kaykay gesina aw.

²⁶ Azladedə, nərəzəw gəl añkul, akul uwana

✧ **1:20 1.20** Job 12.17; Yesayya 19.12; 33.18; 44.25

Zəzagəla azalà akul tsi. La yewdi aña azladza kà akul məna makor hanəkəli, la maslay, la masləkaway la ahəñ mənğa aw.

²⁷ Ama Zəzagəla atsatsàmàni azlauwana azladza tazalà à atà ala azlakusonju, kà atà aña makəl ziruwi à azlamatsihila gə à gəl. Atsatsàmàni azlagubgubga, kà makəl ziruwi à azlandzəɗa-ndzəɗaga aña gudəñ à vok uwanay à gəl.

²⁸ Atsatsàmàni aya azlauwana, azladza gudəñ à vok tanəñà atà bokuba azlatatak mapəsew atà gə, kà atà makəl ziruwi à azlamənğa à gəl.

²⁹ Kiya uwaga kà dza la ahəñ: 'Gi', agoday la huma Zəzagəla kà mats zlapay aw.

³⁰ Ama akul kà, Zəzagəla azalà akul, kà maham gay à vok la Yesu Kristu la abà. Kà uwana Kristu la uwana aga matsihila gami, uwana asà à ahəñ la zagəla la afik, mədapaka azladza aña Zəzagəla, sà sətaka adagay, mədapəlla la ndzəɗa aña mamətsay la abà babay.

³¹ Asa à Zəzagəla kà uwaga apakà vok bokuba uwana tatsetsèr à wakitə aña à abà:

'Baña dza asal mats zlapay kà, atsa zlapay kà, kà azlatatak uwana Zəzagəla aɗahəñ.'[☆]

2

Gay uwana Pol azəñ la Korintiya

¹ Azladedə gulo, uwarə uwana gədà à awtəy kà maz à akul ala gay mahəɗəñ à ahəñ gə, uwana Sufəl Zəzagəla afətə à anu à ama ala, gəpəh

[☆] **1:31 1.31** Yeremiya 9.24

uwaga la azlagay namnamga aw, ngaha babay gəpəh la hanəkəli aña dza aw.

² La kaslà uwana gədà à mtəga aŋkul kà, gəgəfəŋ à afik kà gi aña mapəhay kà lakəl aña Yesu Kristu pəra, gədapəhay lakəl aña azlatatak anik aw, ama gəpəh kà lakəl aña mamətsay, uwana aməts à ahəf à adi pəra.

³ Mok uwana gəgà la Korintiya, gəgà guḅguḅ, guba akàs gi, gəsukùlàh.

⁴ Mapəh gay Zəzagəla gulo la sayda gulo uwana gəzəŋ kà, agà kà la maslay aña azladza aña gudəŋ à vok aw. Ama la mapəhla ala aña Masasədok Zəzagəla, ngaha la maslay aña,

⁵ kà madɨŋal gəl à vok aŋkul aña matsizl à masəlay aña azladza à afik aw, say à maslay aña Zəzagəla à afik pəra.

Matsihila aña Zəzagəla

⁶ Aña azladza uwana tasafay la tetəvi aña Zəzagəla la tsəh, gətəpakulla matsihila dziriga à uwana hanəkəli aña gudəŋ à vok uwanay aw, ngaha hanəkəli aña azlaməna makoray la gudəŋ à vok uwanay, uwana tadəməts à gay aw.

⁷ Matsihila uwana gəpəhay kà, matsihila aña Zəzagəla. Uwaga kà tatak mahad vok à ahəŋ gà, uwana Zəzagəla atsatsəmənì dagay uwarà, à mok uwana gudəŋ à vok uwaga la ahəŋ dən aw, kà anu aña mad à slaka mazləbay aña à abà.

⁸ Aga la ahəŋ, amiyaka tekula, la tataka aña azlaməna makor gudəŋ à vok uwanay la abà, asəl uwaga tetuwa aw. Agay tasəlay kà, anaka

tazlël Sufël gami, uwana la mazlëbây, à ahàf à adi kà makëfay aw.

⁹ Ama bokuba uwana tatsetsër à wakità Zëzagëla à abà, la uwana adahàn:

'Uwana dza adanëñëñ adatsënëñ didi aw, tatak uwana adada à aresl aña dza à abà dadàn aw, la uwana Zëzagëla adahàn à ahëñ, kà aña azlauwana tawoya masla.'

¹⁰ Hadây, anu la uwana Zëzagëla apëhanula nasiri uwaga la Masasëfok tsikasla aña. Ndzer Masasëfok aslala vok aña masël madzugway aña Zëzagëla uwana la gël aña la afik.

¹¹ Ama dza asël uwana dza anik adzugway aw, say masasëfok aña dza uwatà përa asël. Kiya uwaga babay, dza la ahëñ asël madzugway aña Zëzagëla aw, say Masasëfok Zëzagëla kokudà gël aña përa asël.

¹² Anu la Masasëfok, uwana gudëñ à vok avà à anu aw, asà à ahëñ kà la slaka Zëzagëla. Zëzagëla la uwana aslël à anu uwaga à ahëñ la gël aña, kà anu aña masël dëwdëw tatak uwana avà à anu gesina.

¹³ Gi kà, gëpëh gay uwana azladza tapëhgëla aw. Ama gëpëh à akul, kà uwana Masasëfok Zëzagëla apëh à gi. Ngaha gëtàpla à azlauwana tatsëb slëm à Masasëfok uwaga.

¹⁴ Dza uwana la Masasëfok Zëzagëla aw kà, aslala vok aña mabëz dziriga aña Masasëfok uwaga aw. Kà aña kà, uwaga apakà kà bokuba azlatatak kusonju gà, masla aslala vok aña matsën godega aña à aw, say la mazlakay aña Masasëfok la uwana atsenëñ.

¹⁵ Dza uwana la Masasəḏok Zəzagəla, aslala vok aṇa mavàh tatak gesina ala, ama dza aslala vok aṇa madahalla seriya à gəl aw.

¹⁶ Bokuba uwana tatsətsèr à wakità Zəzagəla à abà:

'Uwa à uwana asəl madzugway aṇa Sufəl Zəzagəla uwa? Uwa à uwana aslala vok aṇa mawulla ala matsihila uwa? Ama anu, anu la madzugway aṇa Kristu.'☆

3

Mavàhla kà delga aw

¹ la dziriga azladedə gulo, mok uwana gi la Korintiya, gəslàla vok aṇa maṙəh à akul bokuba uwana gəṙəhay à azladza, uwana la Masasəḏok Zəzagəla aw. Gəṙəh à akul kà bokuba uwana gəṙəh à azladza gudəṇ à vok, bokuba azlabəza uwana la madiṇal gəl à vok la abà.

² Kà uwaga à uwana, gəvəhà à akul kà awà, awkà tatak may dzaṇdzaṇga aw, kà uwana la mok uwaga kà kaslāw dadəṇ aw. Bə lagonay babay kà, kaslaw aw.

³ Kà uwana tsəràh à lakana kà, kanəfaw kà madehəṇ aṇa gudəṇ à vok. Kadahaw vok maṇor à vok, kagazlahaw, tsa baṇa kiya uwaga ma, kanəfaw kà madehəṇ aṇa gudəṇ à vok kiya aṇa azladza anik aw takay?

⁴ Baṇa dza agod: 'Gi aṇa Pol', dza anik aya: 'Gi aṇa Apolos', uwaga kà manəf madehəṇ aṇa azladza aw takay?

☆ 2:16 2.16 Yesayya 40.13

⁵ Uwa Apolos uwa? Ngaha ma, gi Pol ma gi uwa? Anu sèla nna, kà anu azlamèna slèray aṅa Zèzagèla pèra, uwana Zèzagèla aslèl à akul atà à waṅ, kà akul aṅa maḍiṅ gèl à Kristu à vok. Anu kà məḍàh slèray uwana: ‘Dahàwwaṅ’, Zèzagèla agòḍ à anu.

⁶ Gi gèslèkà, Apolos atəḍal iyaw, ama Zèzagèla la uwana azigèṅ uwaga.

⁷ Haḍay, dza uwana aslèkay, la dza uwana atəḍal iyaw kà, atà tasla tatak aw, Zèzagèla la uwana asla tatak, kà uwana masla la uwana azigèṅ uwaga.

⁸ Dza uwana aslèka, la dza uwana atəḍal iyaw kà, atà kà kalkal. Zèzagèla adavà à kèla uwabe-yuwi aṅatà masik aṅa slèray, la maḍehəṅ aṅha uwana aḍahəṅ,

⁹ anu kà anu tekula la slèray aṅa Zèzagèla la abà, ama akul kà, akul kà bokuba guf uwana Zèzagèla apəsay.

Ngaha aya kà, akul bokuba gày, uwana Zèzagèla aṅalay.

¹⁰ La maslay uwana Zèzagèla avà à gi, gəḍzəkà la slèray la slaka aṅkul. Gəgà bokuba dza uwana aṅal gày, uwana asèl maf matatukway à ahəṅ lela. Gətətəkwəṅ lela, lagonay azladza anik taṅal gày uwaga. Delga kà azlauwana taṅalay, taḍàh haṅkəli kà atà aṅa maṅal gày lela.

¹¹ Zèzagèla afà Kristu à ahəṅ kà bokuba masla la uwana matatukway. Dza aslala vok aṅa maḍàh matatəkw gày anik aya aw.

¹² La matatukway uwatà la gay, azladza tadzəkà maṅalahal à gày, azladza anik la luwà-

luwà, azlaanik la gursu, azlaanik la azlaakur uwana slèm anàtà la ahəŋ kà maŋalàhla à matatukway uwaga à gay. Azlaanik tadəhəŋ la azlaahàf, azlaanik la kəsaf, ŋgaha azlaanik la veviz.

¹³ Ama kəla sləray aŋa uwabeyuwi adàpəhla vok ala la huma seriya, kà uwana la mavakay uwatà la uwana, Zəzagəla adàgur sləray aŋa uwabeyuwi la akàl, ŋgaha anu la gəl gami mədànəŋ sləray gami à baŋa delga.

¹⁴ Baŋa dza aŋal à matatukway uwana à gay, ŋgaha atəf akàl la gay ala kà, dza uwatà adàbəza masik aŋha.

¹⁵ Ama baŋa dza uwana akàl apàd sləray aŋha à gay kà, dza uwatà kà, adàbəza masik aŋha aw, ama masla la gəl aŋha kà adàbəlay, ama bokuba dza uwana atəfa à akàl la gay ala la zlahha à masla.

Məŋ gày aŋa Zəzagəla

¹⁶ Kasəlaw kà akul kà kagaw bokuba məŋ gày Zəzagəla, à uwana Masasəđok Zəzagəla adzà à ahəŋ la aku aw takay?

¹⁷ Iyay zlà, baŋa dza akal məŋ gày Zəzagəla à ahəŋ kà, Zəzagəla adàkalah dza uwaga à ahəŋ suwaŋ. Kà uwana məŋ gày Zəzagəla kà tsidəŋa, ŋgaha məŋ gày Zəzagəla kà akul.

¹⁸ Tsa kità zlà kà, dza avavara gəl aŋha zlà ma aw! Baŋa dza la tataka aŋkul la abà, asal aŋa magay masla haŋkəli aŋa gudəŋ à vok uwanay kà, say agay bokuba dza masəl tatak aw gə dadàŋ, la uwana agay masla haŋkəli la tetəvi dziriga la ama.

19 Uwana gəpəh kiya uwanay kà, azlatatak uwana azladza gudəŋ à vok uwanay asa à atà magay la haŋkəli, uwaga kà, azlatatak deyday la yewdi aŋa Zəzagəla pəra. Uwaga kà bokuba uwana tatsətsər à wakità Zəzagəla à abà, tagòd kà:

'Zəzagəla adàbəza azlamatsihilaga uwaga à tsəh la dəmdem aŋatà la abà.'[☆]

20 La slaka anik babay aya kà, tatsətsər kà:

'Zəzagəla asəl madzugway aŋa azladza, asəl kà deyday.'[☆]

21 Kà uwaga à uwana gəgof à akul kà: Dza atsa zlapay la dza anik la afik aw, kà uwana azlatatak gesina kà, akul kakoraw.

22 Gi Pol, Apolos, Piyer, anu gesina gami kà, anu azlaaŋkul. Amiyaka azlatatak lakana, la azlauwana taləg aw à waŋ la huma la gay gesina kà, azlaaŋkul.

23 Akul kà, akul azlaaŋa Kristu, ŋgaha Kristu babay kà aŋa Zəzagəla.

4

Azlaməna masləlay aŋa Kristu

¹ Asa à gi kà azladza tasəlay kà anu azlaməna sayda aŋa Yesu Kristu, kà anu azlaməna sləray aŋha. Zəzagəla afà à anu nasiri dziriga aŋha uwana à ahəl uwarà, kà anu aŋa masəlla à udfaka ala.

² Akul kà, sələw uwaga adagay, dza, uwana məŋ dza afal tatak à ahəl kà, masla kà say dza dziriga pəra.

☆ 3:19 3.19 Job 5.13 ☆ 3:20 3.20 Mahabay 94.11

³ Kà aṅulo kà, baməraka kakəlaw gi gay à vok, bay kà dagədawali gəgoday aw, amiyaka bà azladza takəl gi gay à vok lakəl aṅa azlatatak anik anik babay kà dagədawali, gəgoday aw. Bà gi babay kà, gəđàh seriya aṅa gəl gulo aw.

⁴ Gəsəl tatak mawisiga gulo dadàṅ aw. Ama uwaga asal magoday kà, gi sətaka dadàṅ magay aw. Sufəl Zəzagəla la uwana masla madàh à gi seriya à gəl pəra.

⁵ Kà uwaga kà, kadəhaw seriya à azladza à gəl dadàṅ aw, say kakudaw mavakay uwana Zəzagəla akədèw à ahəṅ dadàṅ. La vuđ uwana Sufəl Kristu adàzlanalay, adàsəlla à uda à uđaka ala azlatatak uwana la mələs la abà lakana. Uwana azladza tadzugway la ləw aṅatà la tsəh kà, adàsəlla à uda babay. Kiya uwaga kà, Zəzagəla adàzləb kəla uwabeyuwi lakəl aṅa sləray aṅha uwana adəhàṅ. Baṅa dza adəhàṅ mənṅa, azləb masla mənṅa suwaṅ, ama baṅa dza adəhàṅ kay aw, mazləbay atsəhal suwaṅ.

⁶ Azladedə gulo kà, akul la uwana gəpəh uwaga gesina, lakəl gulo, ṅgaha lakəl aṅa Apolos. Asa à gi kà kasəlaw la slaka gami uwana gay uwanay asal magoday. Dza atsəd à makwi uwana lakəl ala tatsetsèr aw: Dza anik aṅkul akədəf à dza anik à ahəṅ, ṅgaha kà mapəseyay dza anik.

⁷ Kak uwana: ‘Gəđuwa azladza anik’, kagodf, kak uwa? Awma Zəzagəla la uwana avà à ka azlatatak uwaga gesina aw takay? Baṅa Zəzagəla la uwana avà à ka uwaga, ma kà mana katsala zlapay zlà ma? Kà mana kagodf kà: Gəbəzà uwaga kà la aslasl gəl gulo zlà ma?

⁸ Kayyà, kadaβəzaw tatak gesina. Akul azlagorobu adagay la tetəvi aña Zəzagəla la tsəh, kazàwàw sufəl, bà amiyaka anu kà mədàzuw sufəl dadəŋ aw. Naka agay delga à baña akul azlasufəl ndzer, la yewdi aña Zəzagəla, ŋgaha anu azlaməna maz gay aña məpakàh azlasufəl babay suwaŋ.

⁹ Ama anu azlaməna masəlay kà, gədzugw kà Zəzagəla kà adagolla anu la lig. Anu kà mədagay kà bokuba azladza uwana seriya mamətsay adatəf à atà à gəl, la yewdi aña azladza la vadavaday la afik. Bokuba marəzlay uwana azladza gesina tanəŋaŋ gesina la gudəŋ uwanay la vok, la slaka azladza, ŋgaha la slaka azlamalika babay.

¹⁰ Azladza tadzugw kà anu azlakusoŋu, tagoɸ, kà uwana məz gay lakəl aña Yesu Kristu. Ama kà akul kà, azlamatsihilaga, kà uwana kahamàw gay à vok la Kristu. Anu kà, azladza tadzugw kà anu azlaguβguβ, ama akul kà, akul azlandzəɸa ndzəɸa. Anu kà azladza tapəsew anu, ama akul kà, azladza tasləkaw akul.

¹¹ Tsərəh à lakana may la nəlay aza anu babay, lukut aga anu la vok babay aw, ŋgaha tazlabàh anu aya, ŋgaha gày gami la ahəŋ aw.

¹² Məɸàh sləray kà aŋuf dà à uda la guday, kà mazlakla gəl gami, la mok uwana azladza tadzək à anu magoɸahay à gəl kà, mədəv kuɸa à Zəzagəla kà mapis atà à gay à vok. La mok uwana azladza tatəreβ anu babay kà, məbasin.

¹³ La mok uwana tatugw à anu gay mawisiga à vok kà, məwulatàla kà la ləv tələmma. Tapakànula lagonay kà bokuba anu azlaàlaha aña

gudəŋ à vok, bà tsəràh à lakana babay kà bokuba anu azlahuyiv aŋa gudəŋ à vok uwanay.

¹⁴ Uwana gətsetser kiya uwanay kà, kà aŋa makəlakulla ziruwì à gəl lakəl aŋa uwana kadə-hàwwàŋ, gəgod magay aw. Uwana gətsetser à akul uwanay kà, kà gi aŋa masləhakulla vok pəra, akul azlabəza gay ləv gulo.

¹⁵ Amiyaka baŋa kabəzaw azlaməna mata-pakulla dəbow kulo, azlauwana tadala akul la tetəvi aŋa Kristu la ama, baba aŋkul kà bà tekula pəra. La mok uwana gəsa à akul ala sifa uwana kahamaw à gay à vok la Yesu Kristu la abà.

¹⁶ Kà uwaga à uwana gədəv à akul kudfa: Kamkam pakaw bokuba gi.

¹⁷ Kà uwaga à uwana gəsləl Timotawus à slaka aŋkul babay. Masla kà bəzi gay ləv gulo, uwana ahoy yewdi aŋa Sufəl Zəzagəla. Masla adà-wulakulla azlatatak uwana à gəl, gəpəhakulla la tetəvi aŋa azlaməna manəf Yesu la tsəh, la tataka azlaməna madiŋal gəl à vok la abà gesina.

¹⁸ Azladza anik anik la tataka azladza aŋkul la abà tats zlapay, tadzugw kà, gəda à awtày aya aw, gəl agodf à atà.

¹⁹ Ama baŋa asa à Sufəl Zəzagəla kà, gəda à awtày kà nekwa. Baŋa gədàda à awtày, asa à gi aŋa masəl azlaməna zlapay uwaga, ama gay aŋatà pəra aw, ama maslay aŋa ndzəda aŋatà babay.

²⁰ Kà uwana makoray aŋa Zəzagəla kà aŋa gay pəra aw, ama la ndzəda aŋa Zəzagəla.

²¹ Mana à uwana asa à akul lagwa ma? Gəda à awtày ma la azəva la ahəl ay, awma la masal

ngaha la ləv tələmma ay?

5

Makudək masla mabila gà à uda la maham gay à vok

la azlaməna gay Zəzagəla

¹ Kəla slaka gesina gətsən tapəhay gay lakəl aᅇa mabila uwana la tataka aᅇkul la abà, mabila uwana amiyaka azlauwana tasəl Zəzagəla aw bay kà, tadəhəᅇ aw. Gətsənəᅇ azladza tapəhay kà dza anik la tataka aᅇkul la abà kà, adaᅇəᅇ mis aᅇa baba aᅇha à gəl.✧

² Ngaha aya kà, akul azlazlapay aya! Kayyà, ᅇuləm naka kagaw la mazaw la gəl la abà, ngaha zil uwana adàh tsəhay gà uwaga la tataka aᅇkul la abà kà, kəsàw à uda la tataka aᅇkul la abà.

³ Gi kà kərkər la akul la sləᅇ vok la abà, ama la masasəᅇok la abà kà, gi nekwa la akul, ngaha gədadàh seriya à dza, uwana adàh tsəhay sləray mawisiga uwaga la tataka aᅇkul la abà à gəl bokuba gi nekwa la akul.

⁴ Gədadəv seriya uwaga à gay, la sləm aᅇa Sufəl gami Yesu. Gəgod à akul kà, la mok uwana kadàhamaw gay à vok kà, madzugway gulo adàgay la tataka aᅇkul la abà, ngaha ndzəᅇa aᅇa Sufəl gami Yesu adàgay la tataka aᅇkul la abà babay.

⁵ La mok uwana khamaw gay à vok kà, vāv dza uwaga à ahəl aᅇa seteni, kà seteni aᅇa mawisəᅇ ala. Kà uwana seteni kà, aga la ndzəᅇa kà lakəl aᅇa sləᅇ vok pəra. Ngaha Zəzagəla

✧ 5:1 5.1 5Musa 22.30

adàbèl masasèdòk aṅha, la makèd gèl à ahèṅ, aṅa mavakay uwana Sufèl adàwul à waṅ.

⁶ Tatak la ahèṅ, à uwana katsawla zlapay aw. Kasèlaw kà tatak makèsl tatak ṅuv, akèsl magol pèhàw à gay aw uwà?

⁷ Zèbàw tatak makèsl tatak maviyaga à uda la tataka aṅkul la abà, uwaga kà tsakana, kà akul aṅa magay sètaka kokudà tsakana. Gàw kalkal bokuba pèhaw mawga uwana tatak makèslìṅ la tsèh aw, kiya uwaga à uwana kagaw, kà uwana Kristu magadzaw aṅa madèvaday Paska aga makèdayga kà aṅami.✧

⁸ Kità kà, mèhab madèvaday Paska. Ama mètà Pain la tatak makèslìṅ aw, mègà kuza-kaka, mènèfà tetèvi aṅa Zèzagèla la lèv tekula. Mèsàk azlatatak mawisiga, uwana taga bokuba azlatatak makèslìṅ, uwaga kà tsakana, ṅaha kà mabila. Ama mètà Pain la tatak makèslìṅ aw, uwaga Pain aṅa sètaka, ṅaha aṅa dziriga.✧

⁹ La teraṅa aṅa wakità gulo, uwana la abà gètsetsèr à akul kà, gègòd à akul kà: ‘Kahamaw gay à vok aw la azladza uwana tadza à ahèṅ la mabila la abà aw’, gègòd à akul.

¹⁰ Baṅa gèpèh kiya uwanay kà, gèpèhay kà azladza uwana tasèl Zèzagèla aw, kagodaw aw. Awaṅ, ama gèpèhay kà akul uwana kasèlaw. Azladza uwana tadfàh mabila, la azlamèna mawoy tatak aṅa azladza anik, la azlamèna madfàh gèl, la azlamèna manèf mazlazlay, uwana à ahèṅ la gudèṅ la vok, mèhèlla à ahèṅ kà azlatatak

✧ 5:7 5.7 2Musa 12.5 ✧ 5:8 5.8 2Musa 13.7; 5Musa 16.3

uwaga gesina, ηuləm mas à uda la gudəη à vok uwanay la abà.

¹¹ Asa à gi kà magodf à akul kà: ‘Kahamaw gay à vok la azlatsəhay dza uwaga aw’. Baηa dza agodf kà: ‘Gi masla madiηal gəl à vok’, ama adàh mabila, baηaw masla agay masla mawoy tatak aηa azladza anik, baηaw masla manəf mazlazlay, baηaw masla agay masla matsak magodfahay à azladza anik à gəl, baηaw agay masla guzu, ηgaha agay masla gəl, kadzaw à ahəη la slaka gà la masla aw, amiyaka tatak may bay kà, kazuwaw la slaka gà aw.

¹² Gi kà gəslala vok aηa madàh seriya à azlaməna à uda à gəl aw, akul kadəhaw seriya kà azlaməna hudf gày à gəl.

¹³ Kà uwana azlaməna à uda kà, Zəzagəla la uwana adàdfaha à atà seriya à gəl. Kudəkàw à uda dza uwana adàh mawisiga la tataka aηkul la abà, bokuba uwana wakità Zəzagəla apəhay.✧

6

Kapaw gudzi à masla madiηal gəl à vok à gəl la huma azladza à uda aw

¹ Baηa dza la tataka aηkul la abà tabay vok gay la dza anik, ma delga à baηa apuwla gudzi à gəl kà la huma azladza uwana tasəl Zəzagəla aw takay? Akəsa à vok kà apuwla gudzi à gəl kà la huma aηa azlaməna madiηal gəl à vok.

² Kasəlaw kà, azladza aηa Zəzagəla la uwana tadàdfah seriya à azladza gudəη à vok uwanay à

✧ 5:13 5.13 5Musa 13.5; 17.7

gəl aw takay? Iyay, haɗay zlà, baɗa ndzer kaɗa-ɗahaw seriya à gudəŋ à vok uwanay à gəl ma, kakay, kaslawwalla vok aɗa matàh azlabəza gay uwana ala la tataka aɗkul la abà aw zlà ma?

³ Kasəlaw babay kà mədàɗah seriya à azlamalika à gəl aw takay? Tsa kiya uwaga, ma baməraka azlatatak bəzaga aɗa gudəŋ à vok uwanay zla ama uwà?

⁴ Ama akul, baɗa akul la magazlay lakəl aɗa tatak anik la tataka aɗkul la abà ma, kakay kaslawwalla vok aɗa mapəh tatak uwaga à azlaməna à uda, uwana atà la matsən vok à gay anina aw ma, kà atà aɗa maɗàh seriya aɗa tatak uwaga ma?

⁵ Ziruwɪ aza à akul aw takay? Aga la ahəŋ la tataka aɗkul la abà à bà dza haɗkəli gà, bà tekula aɗa matahàh azlabəza gay uwana alaa la tataka aɗkul la abà, akul azlaməna madiɗal gəl à vok aw takay?

⁶ Iyay zlà, uwaga ma, akəsa vok ndzer kà mapuw gudzi à deda aɗkul anik à gəl, la huma aɗa azladza uwana tasəl Zəzagəla aw takay?

⁷ Baɗa tatak mapuwla vok gudzi à gəl la ahəŋ, la tataka aɗkul la abà, uwaga la uwana adukwakulla tsakana à gəl, uwana kaɗahaw à waɗ. Kà mana kabasaw vok tsakana aw ma? Kà mana kasakawwal ada à akul à gəl à tsəh pəra aw ma? Nuləm mabasiɗ.

⁸ La dziriga kà, akul la uwana kanəfaw mawisiga la mad à gəl, ŋgaha kaɗahaw uwaga kà la slaka azladedda aɗkul məna madiɗal gəl à vok aya bay.

⁹ Sòlàw la dziriga kà, azlamèna makèsa-før tadàda à makoray Zəzagəla aw. Akul, kavavaraw gəl ankul aw. Azlamèna mabila, azlamèna manəf mazlazlay la azlamèna gəl gaw, ŋgaha la azlamèna matsatsəl vok kà atà kà atà zil zil kà, tadàda à makoray Zəzagəla tetuwa aw.

¹⁰ Ŋgaha la azlamèna gəl aŋa tatak aŋa azladza anik, la azlamèna makad yewdi à azla-tatak aŋa azladza anik à tsəh, la azlamèna guzu, la azlamèna matsak magodahay à azladza anik à gəl, ŋgaha la azlamèna mazaɓ tatak aŋa azladza anik la ndzəfa, azlatsəhay dza uwaga gesina kà, tadàbək asik à abatà babay aw.

¹¹ Kiya uwaga à madz à ahəŋ aŋa azladza anik ankul uwarà. Ama lagonay kà, Masasədok Zəzagəla uwana mənəfay kà adapal akul la tsakana gami la abà gesina sətaka adagay, akul mabək akul à fəta à awtəy gə, kà ana Zəzagəla, kagaw dziriga la huma Zəzagəla kà sləm aŋa Sufəl Yesu Kristu uwana kasəlaw, ŋgaha kà Masasədok aŋa Zəzagəla gami.

Maday uwana akəs à Zəzagəla à gəl

¹² Iyay, azladza aŋuvaw la tataka ankul la abà tagod kà: ‘Tatak gesina kà, tetəvi la ahəŋ kà aŋami’, tagod. Iyay dziriga nəma, ama tatak gesina kà, akəsa à akul vok aw. Ama gi kà, asa à gi kà tatak anik afà à gi asik à gəl, kà gi aŋa magay mayà aŋha aw.

¹³ Madzugway aŋatà bay kà: ‘Zəzagəla adaha tatak may kà aŋa hud’, tagod. ‘Ŋgaha hud babay kà aŋa maf tatak may à abà’, tagod aya. Iyay nəma. Ama Zəzagəla adəkalah à ahəŋ vərđi anik

səla nna. Ama kà aṅa mabila kà, Zəzagəla adfahà vok gami kà aṅa uwaga aw, ama Zəzagəla adfahà kà anu aṅa madfàhla sləray, uwana asa à Sufəl Yesu, kà uwana masla la uwana akor vok gami.

¹⁴ Zəzagəla awùlla Sufəl Yesu à uda la mamətsay, ṅgaha masla adàwulla anu à uda la mamətsay la ndzədfa aṅha aya babay.

¹⁵ Kasəlaw kà vok aṅkul kà manəbay aṅa vok aṅa Yesu Kristu aw takay? Gəsləhàni manəbay aṅa vok aṅa Yesu, ṅgaha gi aṅa madla à slaka aṅa masla mazaḅ zil takay? Awan! Akəs vok aw!

¹⁶ Kasəlaw kà baṅa dza agagamla à vok maləv la masla mazaḅ zil kà, tagay sləḅ vok tekula aw takay? Haḍay, tatsetsèr à wakità à abà kà:

'Atà səla nna, tagay sləḅ vok tekula.'[☆]

¹⁷ Ama dza uwana avà vok aṅha à Sufəl Yesu kà, masla la Yesu kà, atà tekula suwan.

¹⁸ Tsa kità zlà kà, kahoyaw à mabila à ahà! Azlatsakana anik anik uwana azladza tadfa à ahəṅ gesina kà, abəz à huḍ gə aw. Ama dza uwana adfah mabila kà, awis vok aṅha ala la gəl aṅha.

¹⁹ Kasəlaw kà, vok aṅkul kà huḍ gəy aṅa Masasədok Zəzagəla aw takay? Zəzagəla la uwana avà à akul Masasədok uwanay à uwana la ləv aṅkul la tsəh, kà uwana vok aṅkul kakoraw aw, Zəzagəla akoray.

²⁰ Zəzagəla apəl tatak kà mənḡa aṅa mava-varla akul. Kiya uwaga dfahàw sləray la vok aṅkul kà mazləḅla Zəzagəla pəra.

[☆] **6:16 6.16** 1Musa 2.24

7

Gay lakəl aṇa mazəb vok

¹ Lagwa kà, gəwula à gay aṇa manavay aṅkul uwana à tsəh, kanàvaw à gi, la wakità aṅkul la abà zlà. Gədzugw kà delga nəma, kà dza aṇa mazəb mis aw.

² Ama la madzugway gulo la abà aya kà, ṇuləm mazəb mis, gəl agod à gi, kà dza aṇa matəd à mabila à abà. Delga kà uwabeyuwi aṇa magay la mis, ṇgaha kà azlamis bay tagay kità.

³ Kiya uwaga kà, zil avà à mis aṇha à tatak uwana mis aṇha ayahay, ṇgaha bay, mis avà à zil aṇha à tatak uwana zil aṇha ayahay.

⁴ Mis aslala vok aṇa mahən, uwana ala asa à vok aṇha aw: Say zil aṇha. Zil babay aslala vok aṇa mahən, uwana ala asa à vok aṇha bay aw, say mis aṇha la uwana ahənallaṇ ala.

⁵ Kiya uwaga zlà kà, kakwesawla kà vok mahən à ahən kà akul à akul aw, say akul katsənaw vok à gay kà aṇa kaslà ṇuv lakəl aṇha, kà akul aṇa mazəb kaslà aṇa madəv kuḍa à Zəzagəla. Ama la lig la ahən hamàw gay à vok aya. Tsa baṇa kità aw kà, kadàslawwala vok aṇa masləh vok à vok aṅkul aya aw, kà akul aṇa mav tetəvi à seteni kiga aw.

⁶ Ama: ‘Dahàwwàṇ uwanay’, gəgod à akul, la magay zlà ma, aw. Ama agayṇa kadahawwan kiya uwanay kà naka delga, gəgod pəra.

⁷ Kəla kà, agay la madzugway gulo kà, naka delga azladza tadza à ahən kokuḍa mis bokuba gi, gəgod. Ama kəla uwabeyuwi kà, abəzà mavay gərgər la slaka Zəzagəla. A azladza anik

kà, avà à atà maslay aña madz à ahəŋ kiya uwanay kokufa mis, à dza anik avàl maslay aña madz à ahəŋ la mis.

⁸ Lagonay kà, gədàgola à huma kà à slaka azlamagamza la azlamis kudfa kà mapəh à atà gay. Gəgodf à atà, kà delga, kà atà tadza à ahəŋ bokuba gi.

⁹ Ama baña kaslaw aw, kazəbaw mis. Nuləm kà mis, kà akul aña mahəl gəl à ahəŋ la madzugway aŋkul la abà.

¹⁰ Lagwa kà, gəpəhay kà azlauwana la azlamis adagay zlà, la tataka aña azlaməna madiŋal gəl à vok la abà. Mapəhay uwanay kà gi gəpəh aw, ama Sufəl Zəzagəla la uwana apəh. Mis uwana adada à zil, aslala vok aña mavàh vok ala la zil aŋha aya aw, ama baña avàh vok ala kà, ada à zil anik aya aw, tsa baña kətà aw kà, tawul à vok à tsəh la zil aŋha.

¹¹ Nğaha bay zil aslala vok aña makudək mis aŋha aw.

¹² Lagonay kà, gəpəhay kà à azlaməna à uda adagay zlà, uwanay kà gay gulo, awkà gay aña Sufəl Yesu aw. Baña masla madiŋal gəl à vok la mis, uwana adiŋal gəl à vok aw, ama asal madz à ahəŋ la zil aŋha, uwaga kà akudək aw.

¹³ Kà aña mis uwana masla madiŋal gəl à vok babay kà, kiya uwanay bay. Baña zil aŋha adiŋal gəl à vok aw, ama asal madz à ahəŋ atà səla kà, ada aŋha aw.

¹⁴ Uwana gəpəh uwanay kà, kà uwana zil masla madiŋal gəl à vok aw gà uwanay kà, Zəzagəla akəs kà, kà mis aŋha, uwana masla

madıñal gəl à vok. Nğaha mis masla madıñal gəl à vok gà aw gà, uwanay aya kà Zəzagəla akəs kà, kà zil aña uwana adıñal gəl à vok aya suwañ. Tsa aña kità aw kà, naka azlabəza aña kà, naka tagay kà bokuba azlabəza aña azladza uwana tasəl Zəzagəla aw gà zla, ama lagwa kà Zəzagəla adakəs atà.

¹⁵ Ama dza uwana adıñal gəl à vok aw, asal mavàhla la masla madıñal gəl à vok kà, vawwal tetəvi. Nğaha kà masla madıñal gəl à vok uwaga, adagay zilga, adagay misga kà, aga la mapəlla la abà adagay zlà. Zəzagəla azalà akul kà, kà madz à ahəñ la lapiya, la tələmma la abà.

¹⁶ Kak mis, kasəl ma kadətəf zil aña ay? Nğaha kak zil babay ma kadətəf mis aña tak ay? Kasəlaw aw!

Dzàw à ahəñ bokuba uwana la abà Zəzagəla azalà akul

¹⁷ Uwaga kà kəsàw, say kəla uwabəyuwi anəf madz à ahəñ aña uwana Zəzagəla avəl lela, nğaha manəf madz à ahəñ aña uwana uwarà Zəzagəla azaləl la abà lela. Uwaga la uwana gəpəhay à azlamaham à ahəñ məna gay Zəzagəla gesina.

¹⁸ Baña dza makədəv à uda gà, la mok uwana Zəzagəla azaləl kà: Kà mana mi, agod aw. Baña dza kokudfa makədəv à uda gà, à mok uwana Zəzagəla azalal kà, ayàh makədəv à uda aya aw.

¹⁹ Magay makədəv à uda bañaw magay kokudfa makədəv à uda kà tatak tekula, makəs vok aña kà ahəñ aw. Tatak uwana akəs vok kà, say makəs mapəhay aña Zəzagəla pəra.

²⁰ Akəsa vok, kà kəla uwabeyuwi adza à ahəŋ la uwana la abà uwarà, la slaka uwana la abà Zəzagəla azaləl à mok uwana atsənà mazalal aŋa Zəzagəla.

²¹ Iyay, mayà uwana Zəzagəla azaləl kà, adzugw gəl aya aw, ama baŋa mas à afik la ahəl apəhla vok ala, kà aŋak aŋa magay la makor gəl la abà babay kà bà delga,

²² mayà uwana Zəzagəla azalal adəgay à makor gəl la abà, kà uwana adagay tekula la Sufəl gami Yesu Kristu. Kiya uwaga babay, dza makor gəl gə, uwana Zəzagəla azalal, adəgay mayà aŋa Zəzagəla, kà uwana adagay aŋha aya.

²³ Zəzagəla avavarà akul la tatak məŋga, kità kà, kagaw azlamayà aŋa azladza aya aw.

²⁴ Azladedə gulo, kamkam, kəla uwabeyuwi adza à ahəŋ la slaka Zəzagəla bokuba uwana adzà à ahəŋ à mok uwana Zəzagəla azaləl.

Gay lakəl aŋa azlamagamza, la azlamis kudə

²⁵ Lakəl aŋa azlamagamza kà, gi la gay aŋa Sufəl kà mapəh à atà aw. Ama madzugway gulo la uwana gəpəh à akul, delga katsəbaw sləm à gay gulo, kà uwana gi kà, gi masla məbədla gay aw, kikay kà maslay aŋa Sufəl Yesu Kristu.

²⁶ Madzugway gulo təbà: Baŋa dza adazəb mis didi aw kà, ŋuləm kà masla adza à ahəŋ à kà matərəbay aŋa lakana uwanay.

²⁷ Baŋa kak la mis bay kà, kakudək aw. Baŋa kak magamza gə babay kà, dzà à ahəŋ kiya uwaga, kayəh mis aw.

²⁸ Iyay zlà, amiyaka gəpəh kiya uwanay babay kà, baŋa kazəb mis kà tsakana, gəgodf magay aw.

Ngaha baŋa dugu ada à zil babay kà, tsakana, gëgodf aw. Ama sèlàw kà, azlauwana la azlamis la uwana tas ngërpa mënŋa la gudëŋ uwanay la vok lakana, ngaha kà asa à gi kà akul aŋa mad à mas ngërpa uwaga à abà aw.

²⁹ Aganay uwana asa à gi mapəhay zlà, azladeda: Kaslà kà desl adagay. Dagay lakana kà, azladza uwana la azlamis kà, taga kà bokuba atà la azlamis aw kəla.

³⁰ Azlauwana tataway kà, taga bokuba atà la iyaw tugwi la adi aw, azlauwana la makəfaslay la gay kà, tanərəz kà bokuba atà la makəfaslay la gay aw, azlaməna masukw tatak babay kà, tanərəz kà bokuba takor tatak uwana tasukw aw.

³¹ Azladza uwana takəs vok la azlatatak aŋa gudëŋ à vok uwanay kà, tanərəz kà bokuba takəs vok la uwaga aya aw, kà uwana gudëŋ à vok uwana kanəŋawwan lagonay kà, adàzila, tuwiz.

³² Lagwa kà, asa à gi kà kahəlaw gəl à ahəŋ kà madzugw gəl. Dza uwana azəb mis aw kà, afa gəl kà à sləray aŋa Sufəl Zəzagəla pəra, ayəh mahəfay kà Sufəl à adi pəra.

³³ Ama dza uwana adazəb mis kà, afa gəl kà azlatatak aŋa gudëŋ à vok uwanay, asal mahəfay kà à mis aŋha à adi suwan.

³⁴ Kiya uwaga ləv aŋha adavahla səla, kiya uwaga la mis babay. Mis uwana zil aŋha la ahəŋ aw baŋaw dahalay uwana la zil aw kà, tafa gəl kà à sləray aŋa Sufəl Zəzagəla. Tavà vok aŋatà la ləv aŋatà gesina à Zəzagəla, ama mis uwana la zil kà, adzugway kà lakəl aŋa azlatatak aŋa

gudəŋ à vok uwanay, kà uwana asal maɗ à ahəŋ kà uwana akəs à zil aŋha à gəl.

³⁵ Uwana gəpəh uwanay kà, kà uwana asa à gi mazlak akul. Gəyàh maɗəɗ akul gay à ahəŋ aw, asa à gi kaɗahawwan kà uwana delga, ɗahàw sləray aŋa Sufəl Zəzagəla la ləv tekula.

³⁶ Lagwa, gədzugw lakəl aŋa azlamawuɗa uwana asa à atà mazəb vok aya aw. Baŋa dahalay atà la mawuɗa aŋha, tadzugw kà atà aŋa mazəb vok aya aw, la lig la ahəŋ kohana adzugway aya kà à mawuɗa aŋha, ŋgaha kà madzugway aŋha gesina kà la masla la tsəh kà, akəsa vok kà mazəbay kà, tazəb vok bokuba uwana asa à atà, uwaga kà tsakana aw.

³⁷ Ama baŋa agəɗaŋ à afik kà, uwala tatak la ahəŋ atərəbəŋ aw, ŋgaha mabila azəŋ aw kà, kità kà, agəɗ à madzugway aŋha à afik, azəb mawuɗa aŋha uwaga aw.

³⁸ Dza uwana azəb mawuɗa aŋha kà, aɗaha delga, ama dza uwana azəb aw aɗaha sləray kà dzəba aŋha səla aw, aɗuwa vok kayak aya.

³⁹ Mis uwana la zil, masla aga la sasala la abà, kà uwana zil aŋha la ahəŋ la sifa. Ama baŋa zil adamətsay, mis adapəlla. Baŋa asal, ada à zil anik, ama say aday kà à mtəga masla maɗiŋal gəl à vok.

⁴⁰ Ama baŋa adza à ahəŋ kokuɗa aŋa maɗ zil kà, marabay aŋha kà ada à zagəla. Kəla kà, uwaga kà madzugway gulo zlà. Ama gi babay kà, gi la Masasəɗok aŋa Zəzagəla à uwana apəhgəla.

Sləb uwana takàd à azlamazlazlay à ahəŋ

¹ Lagwa mənərəz gay lakəl aŋa azlasləb uwana takàd à azlamazlazlay à ahəŋ zlà:

Akul kà kagodəw kà: 'Anu gesina la haŋkəli', kagodəw. La dziriga kà, haŋkəli tsəhay gə uwaga kà adala dza kà à zlapay à abə pəra. Masal la uwana adzərədəh azlaməna madiŋal gəl à vok ala.

² Dza uwana: 'Gəsəl tatak', agod kà, asəl tatak bokuba uwana anaka, asəl dadəŋ aw.

³ Ama dza uwana awoya Zəzagəla kà, Zəzagəla asəl masla.

⁴ Aganay gay gə uwana: Dza aslala vok aŋa mapad sləb, uwana takàd à azlamazlazlay takay? Məsəl kà, mazlazlay kà tatak deyday la gudəŋ uwanay la vok. Məsəl kà say Zəzagəla kokudə gəl aŋha tekula pəra.

⁵ Hadəy gə, azlatatak la ahəŋ la zagəla ŋgaha la vədəh à uwana azladza tasləkaw tatak uwatə bokuba zəzagəla. Azlatatədiya la ahəŋ, kiya uwaga à uwana azladza tasləkaway, tapakahatəla kà azlaməŋga aŋatə bokuba zəzagəla.

⁶ Ama kà aŋami kà, Zəzagəla kà tekula ahəl pəra. Masla la uwana Baba gami. Tatak uwana la gudəŋ la vok gesina kà, aguwa à uda kà la ahəl aŋha. Adəhə anu babay, kà anu aŋa magay azlaaŋha. Sufəl gami babay kà tekula pəra, uwaga kà Yesu Kristu. Tatak gesina atsə à uda la ahəl aŋha, məbəzə sifa babay kà la ahəl aŋha.

⁷ Ama azladza gesina tasəl dziriga uwaga aw. Kà uwana azladza aŋuvaw tadəhla slilih kà la manəf azlamazlazlay, ŋgaha lakana aya baŋa tapad azlasləb uwana takàd à mazlazlay à aya

kà, ndzer tanə̀rə̀z bokuba slə̀b aṅa mazlazlay la dziriga, kà uwana tabè̀z ndzə̀da la tetə̀vi aṅa Zə̀zagə̀la la tsə̀h dadə̀ṅ aw, guba aza à atà, kà madə̀h àlè̀h à vok aṅatà à vok la mapad slə̀b uwaga.

⁸ Ama la dziriga kà, tatak may adə̀haha à anu àlè̀h la slaka Zə̀zagə̀la aw. Baṅa mə̀zuw azlatatak anik aw babay kà mə̀gogolay aw, baṅa mə̀zuw babay kà, agagis anu aw.

⁹ Ama kamkam də̀hə̀w haṅkə̀li, kà uwana akul la makor gəl la abà, kà mazuw tatak gesina. Ama zlahaw kà, uwaga adala dza, uwana azlaguḅguḅ la tetə̀vi aṅa Zə̀zagə̀la la tsə̀h, à tsakana à abà, kà delga aw.

¹⁰ Hadə̀y kà, baṅa dza anik guḅguḅga anə̀ṅa ka, à kak uwana kasəl tatak, kadadza madzay la gə̀y mazlazlay la aku kà mazuw tatak kà, masla bay kà, adə̀zuway suwaṅ, kà uwana kadəkadə̀lla gəl à vok.

¹¹ Nḡaha deda aṅak maruw vok à ahə̀ṅ gə̀, uwana Kristu amə̀ts kà aṅha kà, masla azila la tsə̀h aṅa masəl tatak aṅak uwana kadə̀hə̀ṅ.

¹² Madə̀h tsakana tsə̀hay uwaga kà, delga aw. Katsalla matekwid à deda aṅak, azə̀ṅ la madzugway aṅha la abà, nḡaha bay kà, kadə̀h tsakana kà à Kristu à vok la gəl aṅha babay.

¹³ Tsa baṅa tatak may la uwana atsala matekwid à deda gulo kà, kà mad à tsakana à abà kà, nḡləm gə̀pad azlaslə̀b uwana takə̀d à azlamazlazlay à ahə̀ṅ dʒikidʒiki aw, nḡaha kà, gi aṅa matsala matekwid à deda gulo aw.

9

Gay lakəl aña azlaməna masləlay

¹ Gi kà, gi la makor gəl la abà aw takay? Gi masləlay aw ay? Nğaha gənəñà Yesu Kristu la yewdi gulo. Akul uwanay kà akul mayyi à tsəh aña sləray gulo uwana gədfahəñ aw takay?

² Iyay, amiyaka azladza anik takəs gi bokuba gi masləlay aw kà, akul kà, kasəlaw gi, kà gi masla masləl gi gà, kà maham gay à vok aṅkul, uwana la Yesu la abà, apəhla kà, gi masləlay ndzer, kà uwana gi la gəl gulo la uwana gəpəh à akul gay marabəñ.

³ Aganay tatak uwana gəpəh à azladza uwana taslaħa gi məl à gəl.

⁴ Azlayla gi kà gəbəzal tatak may la tatak masay kà aña sləray gulo aw takay?

⁵ Azlayla gi kà, gi aña mazəb mis masla madiṅal gəl à vok gà, kà mauguzahay anu səla, bokuba uwana azlaməna masləlay anik, la azladedə aña Sufəl gami, la Piyer aw takay?

⁶ Awma anu la Barnabas la uwana mədfəh sləray kà anu aña madzadzər gəl gami pəra takay?

⁷ Slodzi uwana la guvəl la gay, ma masla adzadzər gəl aṅha takay? Awma dza ma uwala à uwana azuw mayyay tatak aña guf aṅha, uwana asləka aw la? Masla manəñla azlaləmana, ma asa awà aṅatà aw takay?

⁸ Ama kadzugwaw kà mapəhay gulo kà, apəhay aña azladza pəra, kagodaw aw, awaṅ, wakità seriya aña Zəzagəla babay kà apəh kiya uwaga.

9 Aganay uwana tatsetsèr à wakità Zəzagəla à abà:

'Kawadaw gay à kokur uwana à ahəŋ, azlaβ hi aw.'☆

Zəzagəla ma adzugw ma lakəl aŋa kokur, kagodaw takay?

10 Kasəlaw kà, la dziriga kà, apəh kà anu aw takay? La dziriga kà, gay uwatà kà tatsetsèr kà aŋami, akəsà vok kà masla mapəs guf, la masla mazlaβ tatak kà, say tadəv sləray aŋatà à gay lela kəla, la maf madzugway aŋatà à ahəŋ kà humà gə aŋatà la tatak uwaga la abà suwaŋ.

11 Anu mətəsf makəs vok aŋa tatak gudəŋ à vok la slaka aŋkul, ma uwaga ma tatak delga aw takay?

12 Baŋa azlawla azlaanik kà maβəz tatak la ahəl aŋkul ma, anu la uwana azlawla anu kaykay aw takay?

Adagay kiya uwaga babay kà anu, kà mədfahəŋ kiya uwaga aw, bə kəla ŋgərpa uwana aβəz anu kà, anu kà məbasin kà anu aŋa madfah tatak uwana adəf gay à azladza anik à ahəŋ aŋa matsən gay marabəŋ lakəl aŋa Yesu Kristu aw.

13 Sələw la dziriga kà, azlauwana tadəh sləray la məŋ gəy Zəzagəla la aku kà, tabəz tatak may aŋatà la aku la abatà. Ŋgaha azlaməna makad tatak la aku la abatà, tabəz humà gə aŋatà la azlatatak uwatà la abà takadaw.☆

14 Kiya uwaga babay, Sufəl Yesu apəh kà azlauwana taz gay marabəŋ kà, tadzadzar vok la uwatà suwaŋ, agòf.

¹⁵ Amiyaka adagay kiya uwanay babay kà, gèda à ahèṅ kiya uwaga aw. Gətsetser kà masləl gi tatak à awaṅ, gəgodf à akul, aw. Kà uwana ṅuləm gəməts kà manav tatak à kà dza aṅa makəl gi marabay gulo ala aw.

¹⁶ Gi, gəts zlapay kà maz gay marabəṅ aw, kà uwana kà leri gà kà aṅulo kà madəhəṅ. Baṅa gi gəz gay marabəṅ uwaga aw kà, matərəbay agay la gi.

¹⁷ Agayṅa gi la uwana gəkəsàni sləray uwaga la ahəl gulo kà madəhəṅ kà, naka gəkud mabəz masik. Iyay, tsa uwaga kà, sləray gulo kà madəhəṅ kà, say gəduw yewdi kà à abà sləray, uwana Zəzagəla afà à gi à ahəl la gəl aṅha.

¹⁸ Gi ma mana à masik gulo zlà ma? Aganay masik gulo: Gəz gay marabəṅ kà deyday, kà uwana gənava aṅuf aṅa sləray sayda uwana gədehəṅ aw, ama naka azlayla gi nəma.

Asa à gi masəlla azladza à slaka Zəzagəla pəra

¹⁹ Gi la makor gəl la abà, gi mayà aṅa dza aw. Ama gi la gəl gulo la uwana gəpakà gəl gulo ala kà mayà, ṅgaha gi aṅa masəlla azladza à slaka Kristu.

²⁰ Mok uwana gəđàh sləray la tataka azla Yahudiya la abà kà, gədzà à ahèṅ bokuba gi zil Yahudiya, kà gi aṅa mabəz atà, ama gi la gəl gulo kà, gi la tsəh aṅa mapəhay aṅa Musa aw. Gədzà à ahèṅ la tataka azlauwana tanəfa mapəhay, gədzà à ahèṅ bokuba aṅatà, kà gi aṅa mabəz atà.

²¹ Kiya uwaga, mok uwana gədzà à ahèṅ la tataka azlauwana la abà tasəl mapəhay aṅa

Musa aw, gødza à ahəŋ bokuba aŋatà, la kokudfa maf gəl à mapəhay uwaga, kà gi aŋa maβəz atà la kokudfa maf gəl à mapəhay uwaga, kà gi aŋa maβəz atà suwaŋ. Ama uwaga kà, asal magodfay kà, gəkəs mapəhay aw, magay aw, awaŋ, gənəfa mapəhay aŋa Yesu Kristu.

²² La huma aŋa azlauwana atà maruw vok à ahəŋ gà kà, gi babay gəga aŋa maβəz atà. Uwaga gədehəŋ gesina kà, kà gi aŋa maβəz atà, ŋgaha atà aŋa maβəlay, amiyaka tekula aŋatà aŋa mazilaw.

²³ Uwana gədfəh uwaga gesina kà, kà gay marabəŋ aŋa mad à huma à gay lela, kà gi aŋa maβəz masik la azladza anik bay.

²⁴ Kasəlaw la dziriga kà, azladza uwana tagor mahoyay, gesina aŋatà tahoyay, ama dza tekula la uwana adəbəza masik uwana tapəh pəra. Kità kà, gòrəw mahoyay, kà akul aŋa maβəz masik.

²⁵ Dza uwana asal magor mahoyay kà, say atsətsəh vok ala dagay uwarə dadəŋ, kà masla aŋa maβəz masik. Ama masik uwatə adəbəzal la gudəŋ uwanay la vok, kà adəwisla. Kəla kà, kà aŋami kà, mətsətsəh vok ala kà, kà anu aŋa maβəz masik uwana adəv à gay aw, akəl adəsal à adi ala aw.

²⁶ Kà uwaga à uwana gədəgay la matsək yewdi, kà say à huma à gay kabaw. Kà uwaga à uwana gədəgay kà bokuba masla madəf kotəpa uwana azlab afad deyday aw.

²⁷ Gəsal vok gulo lela, kà gi aŋa makor vok gulo, kà la marabəŋ makəf gəl à ahəŋ, kà Zəzagəla aŋa magolla gi la lig à gi uwana gəzə gay marabəŋ aŋha à azladza anik aw.

10

Kahamaw gay à vok la azlamazlazlay aw

¹ Azladede, delga awul à akul à gəl, lakəl aña azlababa gami madzidziga uwana tauguzàh la Musa. Zəzagəla adək à atà magudu gudu à gəl gesina, atsakà atà à ama, ɲgaha gesina aɲatà taguwà à uda la mukwà mativga la abà aya.*

² Atà gesina aɲatà kà taβəzà batem la magudu gudu, ɲgaha la mukwà mativga la abà. Atà gesina aña tahamà gay à vok la Musa.

³ Atà gesina aɲatà tazùw tatak may uwana asà à ahəɲ la slaka Zəzagəla babay.

⁴ Tasàh iyaw uwana akalàh à uda la dzəgla la abà, uwana Zəzagəla avàh à atà dzəgla, uwana Zəzagəla avà à atà kà, kà Yesu Kristu uwana aguwà à huma.*

⁵ Bà la uwaga gesina kà, Zəzagəla akweskà madehəɲ aɲatà, kà uwaga à uwana gesina aɲatà tamàts à kəsaf à abà.

⁶ Azlatatak uwaga kà tazlaka anu lakana, kà anu aña madàh à adi la mabila mawisiga uwana atà tadəhàhàɲ aw.

⁷ Kasləkawaw azlamazlazlay bokuba uwana azlaanik aɲatà tadəhàhàɲ aw. Wakità agod lakəl kà:

'Azladza tadzà madzay, tazùw tatak, tasàhàh tatak, ɲgaha tasà à afik kà mahab dəs azlamazlazlay.*

Kamkam, kà aɲkul kà kasləkawaw azlamazlazlay aw.

* **10:1 10.1** 2Musa 13.21-22 * **10:4 10.4** 2Musa 16.35; 17.6

* **10:7 10.7** 2Musa 32.6

⁸ Kadfahaw mabila bokuba azlaanik aṅatà, uwana dza dèbow dzik sèla gəl aṅha makər tamatsà à gay la mavakay tekula la tsèh aw.

⁹ Digiya katapaw Sufəl Zəzagəla, bokuba azladza anik aṅatà aw. Atà tamatsàh à matsàh atà aṅa bebi à abà.

¹⁰ Kaṅoṅuzaw lakəl aṅa Zəzagəla bokuba azlaanik aṅatà uwana tafahàhàṅ aw. Malika aṅa mamətsay azahà atà ala. Akul kà kadfahawwan kiya aṅatà aw.

¹¹ Uwana Zəzagəla adfahàhà azlatatak uwaga gesina kà, kà azladza aṅa masəl azlatatak la uwaga la abà, ṅgaha kà atà aṅa madàh haṅkəli. Tatsetsèr uwaga à wakità à abà, kà atà aṅa matapanula azlatatak à anu azladza aṅa zamana uwanay azladəv à gay.

¹² Kà uwaga, dzàw à ahəṅ dzawwa. Dza uwana adatsizlla à ahəṅ kà, say adfaha haṅkəli kà masla aṅa matəd à ahəṅ aw.

¹³ Azlamatərabay uwana tabəza akul kà, tabəza azladza gesina babay. Ama Zəzagəla, uwana agədīṅ dziriga aṅha à afik kà, asak à matərabay kà matərab akul la azlatatak uwana la abà, aduwa ndzəda aṅkul aw. Masla adàvə à akul ndzəda kà mabasiṅ, ṅgaha kà mas à uda la abà aya babay.

¹⁴ Kà uwaga azladedə gay ləv gulo, hòyàw à azlamazlazlay à ahəl.

¹⁵ Gəpəhay kà akul azladza matsən sləm gə, nərəzàw lakəl aṅkul à uwana gəpəhay tsi, kà uwana dziri à uwana gəpəhay.

¹⁶ Akul dzùgwàw lakəl aṅa tatak may aṅa Sufəl uwana məzuwahay tsi. La mok uwana

məzuway la slaka gə, à tatak may aña Sufəl, kasəlaw kà anu la Kristu mədahama gay à vok la aņiz tekula la abà aw takay? Mok uwana mətsək kaf ala kà mazuway kà, kasəlaw kà mədham gay à vok la sləb vok aña Yesu Kristu la abà tekula aw takay?

¹⁷ Kaf kà tekula pəra à uwana anu gesina məzuway, kaf tekula gə uwaga kà aṗəhla ala kà mədagay tekula, kà uwana məzùw kà kaf tekula uwatà.

¹⁸ Dzùgwàw lakəl aña tsəhay Isərayel dadəņ tsi. Takəđàh azlatatak à Zəzagəla kà, azlauwana tapəđàh sləb uwaga kà, atà tekula la Zəzagəla.✧

¹⁹ Mana à uwana mafafad bəga la gay uwaga la abà ma? Sləb uwana dza akəđ à azlamazlazlay la azlamazlazlay ma, tatak dziriga takay? Awan!

²⁰ Ama uwana azlaməna makəđ tatak uwana tasəl Zəzagəla aw kà, takəđay kà à azlamazlazlay, awkà à Zəzagəla aw ama à seteni. Nğaha asa à gi kà kahamaw gay à vok la azlamasəsəđok mawisiga aw.

²¹ Kà uwana kaslawwala vok aña matsəp gay à masakwa aña Sufəl la abà la aña azlamasəsəđok mawisiga la abà aw. Nğaha babay kaslawwala vok aña madz madzay la tatak may aña Sufəl Yesu la adi, nğaha kədzaw madzay la aña masəsəđok mawisiga la adi aya babay aw.

²² Awma asa à anu madla ləv à Sufəl Zəzagəla à huđ takay? Nğaha ma məđuwa masla la ndzəđa takay?

Madz à ahəņ kà matsala matekwid à azladza

✧ 10:18 10.18 3Musa 7.6

anik aw

²³ Haday, azladza anik la tataka ankul la abà tagod kà: 'Anu la makor gəl la abà kà tatak gesina'. Iyay nəma, ama tatak gesina kà azlaka anu aw pəra. Tagod aya kà: 'Anu la tetəvi kà madàh tatak gesina', ama la azlatatak anik kà, mədàzigənla magay la tetəvi aña Zəzagəla la tsəh aw.

²⁴ Kayahaw kà azlatatak uwana akəsa akul à vok pəra aw, ama yàhàw kà uwana akəsa vok à azladza anik babay suwan.

²⁵ Kəla tatak uwana tadàw ala la kasukwa, bokuba azlasləb kapadaw, kokudà mabək gəl à ahəŋ səla la ləv ankul la tsəh.

²⁶ Haday, bokuba uwana tatsetsèr à wakità Zəzagəla à abà kà, agod kà: 'Sufəl Zəzagəla la uwana akor gudəŋ à vok gesina, la azlatatak uwana la abà gesina.'*

²⁷ Baña masla madiŋal gəl à vok aw anik, azala akul kà mazuw tatak may la mtəga aŋha kà, zùwàw kəla tatak gesina uwana adàfa à akul à huma à gay, la kokudà manaval lakəl aña mabək gəl à ahəŋ səla ankul.

²⁸ Ama kəla kà, baña dza agod à akul kà, sləb uwanay kà sləb mazlazlay kà, uwaga kà kazuwaw zlà ma aw, kà uwana adapəhakulla, ŋgaha kà kak aña makadla gəl à vok, la ləv aŋha la tsəh aw.

²⁹ Madzugway aña ləv ankul gəgod aw, ama aña ləv aŋha. La dziri madzugway aña ləv aña dza aslala vok aña madàh seriya à madzugway aña makor gəl aña ləv gulo à gəl aw.

* 10:26 10.26 Mahabay 24.1

³⁰ Baŋa kikay gədagodf à Zəzagəla kà tatak may gulo aya ma, kakay dza apəsew gi lakəl aŋa tatak may uwana kikay gəgòd'f à Zəzagəla gulo aya ma?

³¹ Uwana gəpəh kà kiya uwanay, kadàzuw mana babey mi, kadàsa mana babey mi, kadàd'fah mana babey mi, d'fahànŋ kà la tetəvi uwana sləm aŋa Sufəl Zəzagəla aŋa maday à huma à gay la mazigənay pəra.

³² Kadahawwaŋ kà la makad'f gəl à azladza à vok aw: Adagay zil Yahudiya, adagay zil Yahudiya aw, adagay azlaməna madiŋal gəl à Zəzagəla à vok.

³³ Dahàwwàŋ bokuba uwana gi gəd'fahəŋ. Gi gədawad'f vok à uda, kà gi aŋa mawoy uwabe-yuwi gesina, gəyàh uwana akəs gi vok aw, say uwana akəs vok à azladza, kà atà aŋa mabəlay.

11

¹ Dzàw à ahəŋ bokuba uwana gədza à ahəŋ, nəfàw gi, bokuba uwana gənəfa Kristu.

Azlazil la azlamis la huma aŋa Zəzagəla

² Azladedə gəzləb akul, kà uwana kadzugwaw lakəl gulo koksikoksi, ŋgaha kà uwana kanəfaw azlatatak uwana gətəpakulla gesina aya.

³ Ama bà la kità kà, asa à gi kà kasəlaw uwanay: Səlàw kà Kristu kà Sufəl gə aŋa azladza gesina. Zil kà mənŋa aŋa mis, ŋgaha Zəzagəla kà masla kà mənŋa aŋa Kristu.

⁴ Kà uwaga baŋa zil adəv kuɗa, baŋaw apəha gay Zəzagəla la gày la aku la maf tatak à gəl gə kà, kiya uwaga kà masla apəsew mənŋa aŋha.

5 Kiya uwaga babay baɲa mis adəv kuɖa baɲaw apəh gay Zəzagəla la gày la aku la gəl deyday gà kà, apəsew zil aɲha. Apakay kà bokuba masla mafəts gəl à ahəɲ gà.

6 Tsa baɲa mis awaɖ nalbət à gəl aw, ma kà mana afəts gəl à ahəɲ pəra aw zlà ma? Ama masl aɲidz aɲa mis la mafəts gəl à ahəɲ kà uwaga kà ziruwɪ, say awaɖah nalbət à gəl.

7 Ama zil kà afa tatak à gəl aw, kà uwana masla maftsa vok aɲa Zəzagəla. Masla apəhla mazləbay aɲa Zəzagəla ala, ama mis kà apəhla kà mazləbay aɲa zil aɲha ala suwaɲ.

8 Haɖay kà, zil kà asà à uda kà la mis la abà aw, ama mis la uwana, asà à uda la zil la abà.

9 Zəzagəla aɲəl zil kà aɲa mis aw, ama aɲəl mis kà aɲa zil.☆

10 Kà uwaga à uwana mis ahaɖ gəl à ahəɲ la nalbət, kà masləkaway zil aɲha, ɲgaha kà azlamalika babay.

11 Amiyaka adagay kiya uwanay kà, kà aɲami uwana mədagay tekula la Sufəl Yesu Kristu kà, məsəl kà mis aslala vok aɲa madz à ahəɲ la aslasl gəl aɲha aw, ɲgaha zil babay aslala vok aɲa madz à ahəɲ la aslasl gəl aɲha babay aw. Say atà səla nna.

12 Iyay, bokuba uwana mis kà asa à uda kà la zil la abà kà, kiya uwaga kà, lakana mis la uwana ayyi zil lagwa, ama atà səla nna kà tasà à waɲ la slaka Zəzagəla, masla maɲal tatak gesina.

13 Nərèzàw la gəl aɲkul dadàɲ: Baɲa mis adəv kuɖa à Zəzagəla la gày madəv kuɖa la aku la gəl

☆ 11:9 11.9 1Musa 2.18-23

deyday, ma akəsa vok takay? Wùllàw à gi ala tsi!

¹⁴ Bà la madz à ahəŋ la abà kà, ziruwi kà aŋa zil kà masak aŋidz ziŋziŋga lakəl.

¹⁵ Ama baŋa mis azigənəŋ aŋidz aŋha à gəl kà, uwaga kà tatak dzəba aŋha səla aw gà. Abèz aŋidz aŋha ziŋziŋga bokuba tatak mahadla gəl à ahəŋ.

¹⁶ Ama baŋa dza asal mats gay lakəl aŋa uwaga kà, sèlàw kà, anu kà məsəl madz à ahəŋ anik aw, amiyaka azlaməna gay Zəzagəla babay kà tasəl tetəvi anik babay aw.

*Mazuw tatak may aŋa Sufəl Yesu Kristu
(Mata 26.26-29; Mark 14.22-25; Luka 22.15-20)*

¹⁷ Tatak uwana asa à gi aŋa mapəh à akul kà mazləb anu kagodaw aw. Kà uwana mok uwana kahamaw gay à vok kà aŋa masləkaw Zəzagəla kà, tatak delga kadahawwan aw, ama kadahawwan kà mawisiga, delga aw, gəgod à akul.

¹⁸ Teraŋa kà, mok uwana kahamahaw gay à vok, kà aŋa masləkaw Zəzagəla kà, katsakahawla gərgər, tagod à gi, uwaga ma dziri ay? Wùllàw à gi ala tsi!

¹⁹ (Duli matsakla agay la tataka aŋkul la abà, ŋgaha kà masəlla ala azlauwana azlaaŋa Sufəl Yesu dziriga)

²⁰ Uwana kamahaw gay à vok kà kazawaw tatak may aŋa Sufəl aw.

²¹ Kà uwana kəla uwabeyuwi aŋkul kà av vok aŋa mazuw aŋha, ŋgaha azlaanik tagod à ahəŋ la may gà, ŋgaha azlaanik aya kà guzu adakad atà zlà, gəgod.

²² Tsa baŋa kiya uwaga kaɗahawwanɗ, ma kà mana kazawaw tatak may la mtøga aŋkul aw ma? Asa à akul aŋa mapøsew maham à ahøn mæna maɗiŋal gəl à vok kəla ay? Awma kà, makəl ziruwi à azlauwana à gəl tatak may aŋatà la ahøn aw, kagoɗaw kəla ay? Mana gøpəh à akul lagwa zlà ma kagoɗaw ma? Gəzləb akul, kagoɗaw ay? Awanɗ, gəzləb akul aw!

²³ Aganay matapla uwana Sufəl Yesu atəpɗəla, à uwana gətəpakulla: Sufəl Yesu la vøɗ uwana tatəl kaf à gəl kà mavà y à ahəl aŋa azladza kà, azəb kaf à ahəl,

²⁴ kikay agòɗ à Zəzagəla kà kaf, atsəkà kaf uwaga ala, agòɗ:

'Uwanay kà vok gulo uwana aga matsəkəŋ ala gə kà aŋkul, zùwàw uwaga kà gi aŋa mawul à akul à gəl.'

²⁵ La lig aŋa mazuw tatak may aŋatà la ahøn, azəb kətsaw à ahəl, agòɗ:

'Tatak masay uwana la kətsaw uwanay la abà kà, makəs vok slawda mawga la aŋiz gulo, uwana adàsokw à vøɗah. Kəla kaslà uwana kaɗasahaw uwanay kà, kà gi aŋa mawul à akul à gəl.'✧

²⁶ Mapəhay aŋa Sufəl Yesu uwanay apəhla ala kà, la kəla kaslà uwana kazuwaw kaf uwanay, la mas tatak masal à gəl uwanay kà, kapəhaw kà gay mamətsay aŋha à azladza, tsərah à kaslà uwana Sufəl adàwul à wanɗ.

²⁷ Kà uwaga kà baŋa dza azuw kaf, ŋgaha as tatak masay à uda la kətsaw aŋa Sufəl Yesu la

✧ 11:25 11.25 2Musa 24.6-8; Yeremiya 31.31-34

abà la kokudà, mavàh gəl aṅha ala kà, adàh tsakana à vok aṅa Sufəl Yesu à gəl, ṅgaha à aṅiz aṅha à gəl aya.

²⁸ Kità kà, kəla uwabeyuwi agur gəl aṅha dadàṅ, ṅgaha masla aṅa mazuw kaf, la mas tatak à uda la kətsaw uwaga la abà.

²⁹ Kà uwana baṅa avaha uwaga ala la tatak may deyday gə aw kà, abiy seriya à gəl aṅha la mazuway aṅha la masay aṅha.

³⁰ Kà uwaga à uwana aṅuvaw la tataka aṅkul la abà takàläh à vədah, tapakàh magudu, tapakàh azlaməna đuvats ṅgaha aṅuvaw tamàts à gay aya bay.

³¹ Baṅa anu məgur gəl gami dadàṅ kà, Zəzagəla adàdfaha à anu seriya à gəl aw.

³² Baṅa Sufəl Yesu asləha à anu à vok kà, kà matsatsəh anu ala la tatak uwana la abà kà, seriya aṅa madəkəs anu kiya aṅa azladza anik aw.

³³ Kà uwaga azladedə gulo, baṅa kadàhamaw gay à vok, kà mazuw tatak may aṅa Sufəl kà, kudàhàw vok kà akul aṅa magay la ahəṅ gesina.

³⁴ Baṅa dza la may gə kà, say azuw kaf à huđ la mtəga aṅha, kà maham gay à vok aṅkul aṅa mabiyakulla seriya aṅa Zəzagəla à gəl aw.

Kà aṅa azlagay anik, say baṅa gədàda à awtày la uwana, gədàdəvəṅ à gay zlà.

12

Mavàṅ uwana Masasədok Zəzagəla avàṅ kà mađahla sləṅay

(Rom 12.1-11; 1 Korintiya 14.1-25)

¹ Lagwa adagay kà mēpəh gay aṅa mavà y aṅa Masasəḏok Zəzagəla. Azladedə gulo, asa à gi kà kasəlaw uwaga lela.

² Azladedə, mok uwana kaləgaw aṅa maḏiṅ gəl à Yesu à vok kà, kanəfàhàw azlamazlazlay badaga uwana takòràh akul.

³ Kà uwaga à uwana, asa à gi kà kasəlaw uwaga: Baṅa Masasəḏok Zəzagəla adakəs dza kà, dza uwatà kà aslala vok aṅa magoḏay kà: ‘Yesu kà matsafla gà!’, agoḏay aw. Kiya uwaga babay: ‘Yesu kà Sufəl Zəzagəla’, dza agoḏay aw, say baṅa Masasəḏok Zəzagəla la masla la abà.

⁴ Aga la ahəṅ azlamavà y anik anik gərgagər aṅuvaw, ama Masasəḏok tekula la uwana avà à atà tetəvi gesina aṅatà.

⁵ Aga la ahəṅ azlatatak anik anik aṅuvaw, ama Sufəl Yesu tekula, la uwana avà à atà tetəvi aṅa mavà y uwaga gesina.

⁶ Aga la ahəṅ azlamaslay aṅa maḏàh sləray anik anik gərgagər aṅuvaw, ama Zəzagəla kokuḏa gəl aṅha la uwana avà y à kəla uwabe-yuwi maslay aṅa sləray uwaga.

⁷ Masasəḏok apəhla ala kà, aga la kəla uwabe-yuwi aṅkul la abà, kà akul aṅa mazlakla maham à ahəṅ məna gay Zəzagəla la mavà y uwaga.

⁸ Masasəḏok avà y à dza matsihila, ṅgaha bà la Masasəḏok uwaga avà à dza anik aya maslay aṅa mapəhla madzugway aṅa Zəzagəla ala.

⁹ Kà aṅa dza anik aya kà, Masasəḏok avà l ndzəḏa kà maḏiṅ gəl à Yesu à vok la dziriga. Ngaha avà à dza anik maslay kà mawar azlaməna ḏuvats ala.

¹⁰ Uwaga avà à azladza anik maslay kà madfàh azlanadzipo, à azladza anik aya avà à atà maslay kà mapèh paṅaw aṅa Zəzagəla, uwana apèh à atà, à azladza anik aya avà à atà maslay kà mabadma la azlagay anik anik, à azladza anik aya avà à atà maslay kà mapalla godega aṅa azlagay uwaga ala.

¹¹ Uwaga kà bà Masasədok tekula gà, gà la uwaga à uwana adfàh uwaga gesina, masla avà maslay à dza gərgagər bokuba uwana asal.

Maham à ahəṅ mənə madiṅal gəl à vok kà,

aga kà bokuba vok aṅa dza

¹² Məsəl kà vok aṅa dza kà tekula, ama azlamababay la ahəṅ gərgagər. Amiyaka azlamababay la vok aṅa dza kà gərgagər ama vok kà tekula pəra. La Kristu bay kà kità.

¹³ Ngaha anu azla Yahudiya la azlauwana azla Yahudiya aw, azlamayà baṅaw azladza uwana takor gəl, tafahà anu batem kà, kà anu aṅa magay vok tekula la Masasədok tsikaslaga uwaga la abà, ṅgaha Zəzagəla avà à anu maslay la Masasədok tekula uwaga la abà.

¹⁴ Vok kà, aga la manabay tekula pəra aw, ama manabay dəṅ.

¹⁵ Iyay zlahaw kà, asik agodəy kà: ‘Gi manabay aṅa vok à gi aw, kà uwana gi ahəl aw’, agodəy, ‘Kità kà, gi aṅa vok aw’, bà la uwaga gesina kà masla manabay aṅa vok, ndzer.

¹⁶ Zlahaw sləm agodəy kà: ‘Gi kà gi yewdi aw, gay gà la uwaga gəga manabay aṅa vok aw’, agodəy, bà la dziriga uwaga adəf gay à sləm à ahəṅ aṅa magay manabay aṅa vok aw.

17 Agayña vok gesina kà naka agay kà yewdi përa, ma naka kakay atsën slëm ma? Ngaha agay, agay kà slëm, përa ma naka kakay azin tatak ma?

18 Ndzer, Zëzagëla abëk azlamanabay à vok à vok bokuba uwana asal.

19 Agayña vok gesina agay kà manabay tekula përa kà, uwaga kà naka agay vok aw.

20 Ama lagwa kà, azlamanabay anjvaw la vok tekula la vok.

21 Kiya uwaga kà, yewdi aslala vok anja magod à ahàl kà: 'Gëyah ka aw!', agodal aw. Ngaha takasagël babay aslala vok anja mapëhay uwaga à asik babay aw.

22 Tetuwa kiya uwaga aw! Azlamanabay anja vok, uwana kanëj atà, bokuba takësa kà vok aw, kà atà la uwana takësa kà vok ndzer.

23 Azlamanabay uwana takësa à anu vok aw, mëgod kà, atà la uwana mëfa à atà slëm kaykay, manabay ziruwì gà uwana mëhad atà à ahëj la huma yewdi anja azladza kà, mëkës atà kà la ahàl sëla.

24 Azlamanabay uwana takës anu à gël kaykay, atà kà mënekudà anja mahad atà à ahëj aw. Zëzagëla ahamà gay à vok à vok gesina, avàh à azlamanabay bëzaga maslëkaway gesina.

25 Kà uwana asal kà manjonuzay anja magay la ahëj la vok aw. Ama kà matsën vok gay anja magay la ahëj la tataka azlamanabay anja vok la abà gesina anjatà.

26 Baña manabay tekula azay kà, azlamanabay gesina tazay la slaka gà. Baña tekula anjatà la marabay la abà, gesina anjatà tarabay la slaka gà

suwan, bay.

²⁷ Akul gesina kà, akul vok aña Kristu, ngaha kèla uwabeyuwi aṅkul kà manabay aña vok uwaga.

²⁸ Kiya uwaga à uwana, Zəzagəla avàh sləray à azladza la maham à ahəŋ məna gay Zəzagəla. Teraña: azlaməna masləlay, masəla: azlaməna mapəh à atà gay à ahəl aña Zəzagəla, kà mapàh à azladza, ngaha mamakər aṅha: azlaməna matapla tatak à azladza anik, la lig la ahəŋ: azlaməna maɖàh azlanadzipo, ngaha: azlauwana la maslay kà mawar azlaməna ɖuvats ala, ngaha: azlaməna mazlak à azladza anik anik, ngaha: azlauwana tadala azladza anik anik la tetəvi delga la ama, ngaha: azlauwana la maslay kà mapəh azlagay mələk gə, uwana azladza anik tasəl aw.

²⁹ Gesina aṅatà kà azlaməna masləl atà, baṅaw azlaməna mapəh à atà gay à ahəl aw, baṅaw azlaməna matapla à azladza aw. Gesina aṅatà kà atà la maslay kà atà aña maɖahàh azlanadzipo aw,

³⁰ baṅaw kà mawar azlaməna ɖuvats ala, ngaha la mapəh azlagay mələk gə aw, baṅaw la masàh ala godega aña azlagay uwaga à uda aw.

³¹ Kiya uwaga kà yàhàwàni mavày uwana aɖuwa vok zlà.

Ama lagonay kà, gəpəhakulla tetəvi uwana aɖuwa vok gesina.

13

Tatak uwana aɖuwa vok gesina kà: Masal

¹ Iyay, agayŋa gəsəl azlagay gudəŋ aŋa azladza gesina, amiyaka bə aŋa azlamalika, ŋgaha ma-woy dza gulo la ahəŋ aw kà, kiya uwaga kà gəpaka kà kalkal la mahohumay aŋa dewdew uwana azay la sləm la abə pəra.

² Amiyaka gədəgay la maslay kà maz paŋaw aŋa Zəzagəla à azladza, amiyaka bə gədəsəlay tatak gesina, gədəsəlay godega aŋa nasiri aŋa Zəzagəla, gədədiŋ gəl à Zəzagəla à vok la tsəhay gə, uwana gəslala vok aŋa magoday à gudəŋ: Bəda vok ala la abanay, ama baŋa gəwoyaŋ azladza anik aw kà, gədəpaka tatak deyday pəra.

³ Gədəvəh azlatatak gulo à uda gesina babay, amiyaka bə gəl gulo bay kà maβək à gay la akəl, ama baŋa gəwoyaŋ azladza anik aw kà, makəs vok gulo la ahəŋ aw, gədəpaka tatak deyday.

⁴ Dza uwana la masal, masla abasiŋ azladza anik, masla adəh delga, adəh adi aw, ats zlapay aw, azigəŋ gəl aw.

⁵ Masla masal kà, adəh sləray zirui gə aw, masla afa à gəl kà vok aŋha pəra aw, masla ləv aw, apəh gay lakəl aŋa mawisiga aŋa dza aw, la maf dza à ləv aw.

⁶ Masla arabay kà sləray mawisiga aw, ama arabay kà, kà sləray delga.

⁷ Masla uwana la masal kà, abas tatak gesina, madiŋal gəl à vok aŋha, la manewəŋ aŋha, la mabasiŋ aŋha atetuway diki diki aw.

⁸ Masal kà adəv à gay aw, mapəhay aŋa Zəzagəla uwana apəh à azladza à ahəl kà mapah à atə kà, adədəv à gay à baŋa məlo aŋha adəslay. Azlagay gudəŋ aŋa azladza gesina, uwana məpəhay kà, adədəv à gay babay, bə

masəl tatak gami uwana məsəl tatak babay kà adàzahla.

⁹ Kà uwana masəlay gami, la mapəhay gami kà uwana məz paŋaw aŋa Zəzagəla uwana apəh à anu à ahàl kà ahən ala babay aw.

¹⁰ Ama mok uwana tatak ahən ala gà adàsa à waŋ kà, tatak uwana ahən ala aw kà, adàziyla gesina.

¹¹ Mok uwana gi bəziga kà, gəpəhəh gay bəzi, gədzüğwəh ŋgaha gənawəhəŋ mabəzi bəzi, ama mok uwana gədagay magolga, gəsək à tatak azlabəza la tsəh ala gesina.

¹² Lagonay kà, mənəŋəŋ kà bokuba fatew uwana la kutərum la abà, mənəŋəŋ la dziriga aw. Ama kaslā adəslay à uwana mədənəŋ Zəzagəla yewdi la yewdi. Lagonay kà, gəsəl kà gəl gə gəl gə pəra, ama la kaslā uwatà kà, gədəsəlay la lela bokuba uwana masla uwana asəl gi babay.

¹³ Lagonay kà, tatak makər uwaga la uwana tagədəŋ à afik: Madiŋal gəl à vok, manewəŋ, ŋgaha masal. Ama masal la uwana aduwa azla-tatak anik anik gesina la kaykay.

14

Gay anik lakəl aŋa mavà y aŋa Masasədok Zəzagəla

(Rom 12.1-13; 1 Korintiya 12.1-11)

¹ Wədàw vok à uda kà akul aŋa magay la masal,wòyàwwàŋ la ləv tekula! Mavà y uwana Masasədok Zəzagəla avàhà à azladza, kà akul aŋa mabəzal suwaŋ. Uwana wòyàwwàŋ, gəgod

à akul, kaykay kà, maslay aña mapəhla gay Zəzagəla à azladza uwana Zəzagəla apakullaŋ.

² Masla mapəh gay məlok gə, uwana azladza anik tasəl aw kà, say apəhay kà à Zəzagəla pəra, kà uwana dza asəl gay uwaga aw. La ndzəfə aña Masasəfok Zəzagəla dza apəh nasiri.

³ Ama dza uwana az paŋaw aña Zəzagəla, uwana apəhal kà, azigənəŋ kà azladza la madiŋal gəl à vok la abà, kà madzərəfəh atà à uda, ŋgaha kà mataslàh atà à gay à ahəŋ.

⁴ Dza uwana abadma la azlagay məlok gə, uwana azladza anik tasəl aw, adzərəfəŋ kà madiŋal gəl à vok aña à uda pəra. Ama dza uwana az paŋaw aña Zəzagəla, uwana apəhal kà mapəh à azladza kà, avà ndzəfə à məna madiŋal gəl à vok la maham à ahəŋ məna gay Zəzagəla gesina.

⁵ Asa à gi, kà akul gesina kà kavatsaw gay la azlagay məlok gə, uwana azladza anik tasəl aw. Ama uwana gəyahay kaykay aya kà, akul aña mabəz maslay aña maz paŋaw aña Zəzagəla uwana apəh à azladza à ahəl. Hadfay kà, dza uwana av sayda uwaga kà, uwaga la uwana akəsa vok à dza, uwana asəl azlagay məlok gə, ŋuləm kà say masla mawulla à uda aga la ahəŋ, kà madzərəfə azlaməna madiŋal gəl à vok ala.

⁶ Azladedə, gənava akul: La mok uwana gədàda à awtəy à slaka aŋkul, la mana gədəkəs à akul à vok, à baña gədəvats gay kà la azlagay məlok gə uwana azladza tasəlaw ma? Gədəkəs akul à vok aw, say baña gədəsa akul à uda dziriga aña Zəzagəla, baŋaw gəpəhakulla tatak

anik anik, baṇaw masəlay anik anik, baṇaw sayda uwana maḃəzal gà la slaka Zəzagəla, baṇaw matapla anik anik.

⁷ Dzùgwàw lakəl aṇa azlatatak matsay kà aṇa marəzlay tsi, bokuba talakway baṇaw ṇiziṇ, baṇa masla matsay la masla maḃəḃay tava kuda aṇha aw ma kakay dza asəl mahabal à tsəh lela ma?

⁸ Baṇaw, baṇa masla mats mazlazliṇ aṇa guvəl atsay lela aw ma, uwa ada à guvəl uwa?

⁹ Kiya uwaga la slaka aṇkul babay, baṇa kapəhaw gay mələk gà, uwana dza asəl aw, kakay dza atsən uwana kapəhaw ma? Aṇa kiya uwaga, kà gay aṇkul uwana kapəhaw kà, adagay gay deyday bokuba maḃəḃay aṇa afad.

¹⁰ Aga la ahəṇ azlagay gərgagər la gudəṇ la vok, kəla tsəhay uwala beyli kà la gay aṇha.

¹¹ Ama baṇa gətsəna gay uwana dza apəh à gi aw kà, dza uwana apəh à gi gay uwaga kà gədàpakiṇ ala kà, kà dza mələk gà la slaka gulo, ṇgaha gi babay gədəgay mələk gà la huma aṇha suwaṇ.

¹² Tsa akul kà, kavàw ndzəḃa à azlamavày uwaga zlà kà, yàhàw aṇa magay gorobu kà aṇa azlauwana tadala maham à ahəṇ məna gay Zəzagəla à huma à gay la maḃiṇal gəl à vok la abà zlà.

¹³ Kà uwaga baṇa dza la maslay kà mavats gay la azlagay mələk gà, uwana azladza anik tasəl aw kà, say dza uwaga anav maslay la slaka Zəzagəla, kà mav maslay kà masəlla godega aṇa azlagay uwaga à uda kəla babay suwaṇ.

14 Baṅa gədəv kuḍa la gay mələk gə uwaga kà, ləv gulo adəv kuḍa ndzer, ama haṅkəli gulo adəv kuḍa aw.

15 Tsa baṅa kiya uwaga ma, mana gədehəṅ zlà ma? Gədəv kuḍa la masasəḍok gulo, gəhab uwaga kà la haṅkəli gulo babay aya.

16 La kità, baṅa kadəv kuḍa à Zəzagəla la masasəḍok ma, kakay dza masla matsəbal sləm uwana la maham gay vok aṅkul la abà, adàslala vok à magoḍay: 'Amen!' à madəv kuḍa aṅak ma? Kà uwana asəl à uwana kapəhay tetuwa aw.

17 Amiyaka madəv kuḍa aṅak adagay dzəba aṅha səla aw babay kà, akəsa la vok aw.

18 Kikay gəgod à Zəzagəla kà uwana gəḍuwa akul gesina la masəl gay mələk gə, uwana azladza anik tatsənaṅ aw.

19 Ama la huma maham à ahəṅ məna gay Zəzagəla kà, asa à gi mapəh gay zlo uwana tatsəna, kà gi aṅa madzadzaṅ azladza anik ala, à kà mapəh gay dəbow dəbow, uwana azladza anik tasəl aw.

20 Azladedə, kadzugwaw bokuba akul azlabəza aw, à uwana dzùgwàw bokuba akul azlamagol dza. Kà maḍəh mawisiga kà, gəw bokuba azlabəza uwana tasəl maḍəh mawisiga aw.

21 Agay uwana tatsetsər à wakitə Zəzagəla à abà:

'La azlagay mələk gə uwaga à uwana gədəsahla à tsəhay gulo à uda. Ama bà la uwaga kà, tatsiṅgəṅ la ahəl aw',[☆]

Sufəl Zəzagəla agòḍ.

☆ 14:21 14.21 Yesayya 28.11-12

²² Kà uwana mabadɗma la azlagay mɛlok gà kà, adàpakay kà bokuba nadzipo la slaka azladza uwana tadinjal gəl à vok aw, kà atà aɗa masəlay kà, atà la maham gay à vok la abà, la azlaməna madiɗal gəl à vok aw. Ama maz gay Zəzagəla, kà mapəhla paɗae aɗa Zəzagəla ala la slaka aɗa azlaməna madiɗal gəl à vok, ama kà aɗa azladza gesina suwaɗ babay aw.

²³ Bokuba magodɗay kà, maham à ahəɗ məna gay Zəzagəla gesina adahama gay à vok, ɗgaha gesina aɗatà tadzəka mavats gay kà la azlagay mɛlok gà pəra: Baɗa azladza deydayga, uwana tadinjal gəl à vok aw, tada à awtəy à maham gay à vok aɗkul à abà, ɗgaha tatsən uwaga kà, tanərəz akul kà bokuba akul azlakusonɗu aw, takay?

²⁴ Ama baɗa kəla uwabeyuwi az sayda aɗa Zəzagəla, ɗgaha dza deydayga, uwana masla madiɗal gəl à vok aw, ada à awtəy babay kà, kiya uwaga kà, kəla gay uwana adətsənəɗ kà, adəpəhla tsakana aɗha. Gay uwaga gesina kà, adəkəsay lakəl.

²⁵ ɗgaha madzugway uwana la tsəh ləv aɗha gesina, adàsa à uda à udaka ala, ɗgaha adəwulla à gəl à wədah kà masləkaw Zəzagəla la magodɗay kà: 'Ndzer, Zəzagəla la ahəɗ la tataka aɗkul la abà!', agodɗay.

Uwana akəsa vok la maham gay à vok la abà.

²⁶ Azladedə, mana à uwana gəpəh à akul lagwa ma? Mok uwana kahamaw gay à vok la slaka gà, dza anik azəb mahabay, ahab. Dza anik atapla gay Zəzagəla à azladza anik. Dza anik atsala à

atà tatak uwana à uda, Zəzagəla apəhla. Dza anik aya à masla mabədfma la azlagay məlok gə, ɲgaha dza anik atsala godega aɲa gay uwaga à uda apəhay. Kəla tatak uwana kadahawwanj kà, say agay delga, azlaməna gay Zəzagəla tazigənay la masla kəla.

²⁷ Kà aɲa azlagay məlok gə kà, sàkàw kà azladza səla pəra tapəh, ama dza awulla à uda uwana tapəhay, ɲgaha la manəf vok lela, aduwa dza makər aɲa mapəhay aw.

²⁸ Ama baɲa masla mawulla gay uwaga à uda la ahəɲ aw kà, masla mabədfma uwaga adza à ahəɲ titi, apəh uwaga kà la ləv aɲha la tsəh, atà la Zəzagəla aɲha pəra.

²⁹ Ama kà aɲa azlaməna maz paɲaw aɲa Zəzagəla, uwana apəh à atà kà, azladza səla baɲaw makər tapəh gay uwaga, ama say azladza tamədzedəɲ ala uwana tapəhay.

³⁰ Zlahaw kà, la kaslà uwana dza abədfma la uwana, dza anik uwanay abəza gay la slaka Zəzagəla kà, ɲuləm matera adza à ahəɲ dadəɲ.

³¹ Akul gesina kaslawwalla vok aɲa maz gay aɲa paɲaw aɲa Zəzagəla la manəf vok la tekula tekula, ɲgaha azlaməna madiɲal gəl à vok gesina aɲa masəlay, ɲgaha madiɲal gəl à vok aɲa uwabeyuwi aɲa mazingənay.

³² Azlaməna mazàh paɲaw aɲa Zəzagəla tanəɲla gəl aɲatà la huma aɲa Masasədok, uwana Zəzagəla avà à atà.

³³ Zəzagəla kà asal anu mədza à ahəɲ la sehseh la abà aw, ama mədza à ahəɲ la lapiya la abà.

Bokuba uwana adapaka zagəla à azlaməna madiɲal gəl à Zəzagəla à vok gesina,

³⁴ kiya uwaga la maham gay à vok ankul la abà babay. Say azlamis tadza à ahəŋ titi, atà la tetəvi kà mavats gay aw, bokuba uwana tatsetsèr à wakità mapəhay aŋa Zəzagəla à abà: Say tasləkaway pəra.

³⁵ Baŋa asa à atà matsən tatak anik kà, say tanàvəh à zil aŋatà la mtəga, kà uwana uwaga kà, ziruwì kà aŋa mis aŋa mavats gay la huma maham à ahəŋ məna madiŋ gəl à Zəzagəla à vok.

³⁶ Iyay, awma la slaka ankul la uwana gay Zəzagəla asa à uda kagodəw takay? Awma kà ankul pəra à gay uwanay kagodəw ay?

³⁷ Baŋa dza adzugw kà masla aŋa magay masla maz sayda aŋa Zəzagəla, baŋaw adzugw kà, kà adabəza ndzəda aŋa Masasədok Zəzagəla, delga, masla asəlay kà uwanay gətsetser à akul, kà mapəhay aŋa Sufəl Zəzagəla.

³⁸ Ama baŋa asəl aw kà, kafaw sləm à masla aya aw.

³⁹ Kiya uwaga azladedə gulo, mawoyəŋ ankul kà aga kà aŋa maz sayda aŋa Zəzagəla. Ama kasakawwalla tsəh ala aŋa mapəh azlagay mələk gə aw.

⁴⁰ Say tatak gesina ada à vok la tetəvi aŋha, bokuba uwana akəsa vok lela.

15

Mawul à uda aŋa Kristu

¹ Azladedə gulo, vaw gi tetəvi kà gi aŋa mawulla à akul ala gay marabəŋ uwana à gəl gəzakullan, kakəsaw uwaga, madiŋal gəl à vok ankul atsizl kà à uwaga à afik.

² La uwaga la uwana kabèlâw, baŋa kakəsawwaŋ bokuba uwana gəzakulaŋ aw kà, maɲɲal gəl à vok aŋkul apakay kà tatak deyday pəra.

³ Gay uwana aga la gi lakəl kà, gədapəha à akul à vok à abà suwaŋ. Aganay gay uwana gəpəh à akul dadàŋ: Kristu kà aməts kà, kà à ahəl tsakana gami bokuba uwana tatsetsər à wakità à abà.✧

⁴ Tallà masla, ŋgaha awùl à uda la mamətsay la mahənay mamakər, bokuba uwana tatsetsər à wakità Zəzagəla à abà aya.✧

⁵ Masla apəhla vok à Piyer, ŋgaha à azlaməna matapla kulo gəl aŋha səla uwatà bay.

⁶ La lig la ahəŋ apəhla vok à azlaməna asik, uwana aduwa dadərmokw zlo. Azlaanik aŋatà kà atà la ahəŋ tsəràh à lakana, ama azlaanik aŋatà kà tamatsay.

⁷ La lig aŋa uwaga la ahəŋ, apəhla vok à Yakuba, ŋgaha à azlaməna matapla gesina.

⁸ Ŋgaha la lig aŋatà la ahəŋ gesina, apəhgəla vok bay, à gi uwana gəga bokuba bəzi mahənay aw gà.

⁹ Aya gəga matsihila gə aŋa azlaməna matapla anik uwanay gesina. La dziriga kà, gəsla aŋa magay masla matapla aŋha aw, kà uwana gi la uwana gətərəbàhà azlaməna matsalah sləm aŋa Sufəl Zəzagəla à gay gesina.

¹⁰ Ama la vok mahamay aŋa Zəzagəla ada-pakagəla, à dza uwana kanəŋàwwəŋ lagwa, la vok mahamay aŋha lakəl gulo kà apakà deyday

aw. Gədfahà sləray aŋuvaw dafuwa à gay aŋa azlaməna matapla anik gesina, uwaga kà gi gədfahəŋ aw, ama vok mahamay aŋa Zəzagəla uwana la gi la abà.

¹¹ Adagay gi, adagay atà, anu azlaməna matapla gesina, anu məzà gay marabəŋ bokuba uwana gəpəh à akul, kiya uwana kadinəwwalla gəl à vok babay.

Mawul à uda gami la mamətsay

¹² Aganay maz sayda gami uwana məpəhay. Zəzagəla awùlla Yesu à uda la mamətsay. Ŋgaha ma kakay azlaanik aŋkul tagofay kà: Azlamazimnekiđ tadawul à uda aw, tagof ma?

¹³ Baŋa mawul à uda la mamətsay la ahəŋ aw kà, kità kà Yesu Kristu babay kà awul à uda zlà ma aw.

¹⁴ Baŋa Kristu awul à uda aw kà, məpəhay gami babay kà apakà tatak deyday, ŋgaha madiŋal gəl à vok aŋkul babay kà deyday suwaŋ.

¹⁵ Uwana azay aduwa uwaga kà, madàh fida gami à Zəzagəla à vok, à uwana məgod kà, awùlla Kristu à uda la mamətsay. Haday, baŋa azlamazimnekiđ tawul à uda aw kà, kità kà awulà à uda suwaŋ zlà ma aw.

¹⁶ Kà uwana baŋa azlamamatsay tawul à uda aw kà, kità kà Kristu kà awulà à uda babay aw.

¹⁷ Kà uwana baŋa Kristu awùlla à uda aw kà, madiŋal gəl à vok aŋkul akəs sləray aw, akul azlamazàhla gà la tsakana aŋkul la abà, tsərəh à lakana.

¹⁸ Tsa kità kà, azlauwana taməts à madiŋal gəl à vok à abà babay kà, tazàhla.

19 Baņa manewəŋ gami kà lakəl aŋa Yesu, kà aŋa sifa uwanay anu la abà lakana kà, kità kà, anu la uwana vok ahama azladza anik uwanay gesina, kà anu.

20 La dziriga kà, Kristu awulà à uda la mamətsay, kà uwaga à uwana azladza gesina tadawul à uda.

21 Kiya uwaga à uwana mamətsay asà à waŋ à gudəŋ à vok kà dza tekula, kiya uwaga babay mawul à uda la ahəŋ kà dza tekula aya suwaŋ.

22 Azladza gesina tamatsay, kà uwana anu tekula la Adama. Gesina aŋatà tadawul à uda kà maham gay à vok aŋatà la Yesu suwaŋ.

23 Ama kəla mana beymi la tetəvi aŋha: Kristu la uwana aga matera aŋa mawul à uda. La mok uwana adàsa à waŋ, azlaməna mađiŋal gəl à vok gesina tadawul à uda.

24 Kiya uwaga kà, makəđ gəl à ahəŋ adàsa à waŋ: Kristu adəkalah azlandzəđa ala la maslay gesina, ŋgaha la azlamaslay aŋa azlaməna məzam aŋa Zəzagəla gesina bay. Ŋgaha adàvə makoray à ahəl aŋa Zəzagəla Baba,

25 kà uwana leri Kristu adəkoray kà say baņa Zəzagəla adəbək azlaməna məzam à tsəh aŋha dəŋ.✧

26 Masla məzam makəđ gel à ahəŋ, kà uwana Zəzagəla adəkalah à ahəŋ, kà uwaga kà mamətsay.

27 Kà uwana tatsetsèr à wakità Zəzagəla à abà, tagòđ kà:

✧ 15:25 15.25 Mahabay 110.1

'Zəzagəla abək tatak gesina à tsəh asik, kà maf asik à afik aṅha.'[☆]

Baṅa tagòɔf kiya uwanay kà, ndzer kà, Zəzagəla kà aga la tsəh aṅa Kona aṅha aw, kà uwana masla la uwana abək azladza à tsəh asik aṅa Kristu.

²⁸ Baṅa Kona aṅa Zəzagəla adagay masla makoray à azlatatak gesina kà, masla aga la tsəh aṅa Baba aṅha, uwana afəl tatak gesina à ahəl, kiya uwaga kà Zəzagəla Baba adàkoray tatak gesina

²⁹ Dzùgwàw lakəl aṅa azlagay anik tsi. Azladza anik la ahəṅ la maham à ahəṅ aṅkul la abà, uwana tadəhà à atà batem kà aṅa azlamazimnekiɔf uwana tamatsay tsi. La dziriga, baṅa azlamazimnekiɔf tadàwul à uda aw, ma mana madàh batem uwaga akəs vok ma?

³⁰ Anu ma, kà mana məda à huma à gay koksi-koksi la ahəl aṅa mamətsay zlà ma?

³¹ Azladedə gulo, gəzləb akul kà, kà uwana akul la ahəl aṅa Sufəl gami Yesu Kristu, ama gi kà, kəla mavakay gesina kà, gi la kuda mamətsay.

³² La gudəṅ Efesus kà, gəpà slagəla məṅga bokuba map slagəla la azlatatak fəta makəsəfərga. Agayṅa gəgay la manewəṅ aṅa mawul à uda aw kà, naka uwaga akəs gi vok aw, haday! Baṅa azlamazimnekiɔf tadàwul à uda aw kà, ṅuləm mənəfa tetəvi uwanay:

'Məzùw, məsà kà uwana lebəṅ kà mamətsay atsa à waṅ.'[☆]

Gay la gay la abà agodf.

☆ 15:27 15.27 Mahabay 8.6 ☆ 15:32 15.32 Yesayya 22.13

³³ Kapapataw gəl aŋkul aw, mədza à ahəŋ la dza mawisiga awis madz à ahəŋ delga aŋkul ala.

³⁴ Wùlàw à waŋ à dziriga à abà bokuba uwana Zəzagəla ayahay, ŋgaha sàkàw à maďàh tsakana, gəpəh uwaga kà ziruwi aŋa makəs akul, uwana gəpəh uwanay kà, azladza anik la ahəŋ la tataka aŋkul la abà tasəl Zəzagəla aw.

Vok aŋa azlauwana tawul à uda la mamətsay

³⁵ Zlahaw dza anavay: ‘Kakay azlamamatsay tadàwul à uda ma? Vok ma uwala tadàkoray la?’

³⁶ Kayyà, kak la haŋkəli aw! Baŋa kaslək fofulo, ŋgaha fofulo uwatà amətsay dadàŋ, la uwana à uwana atsa à uda.

³⁷ Fofulo uwana kasləkay adagay hi, adagay uwala beyli, kasləka kà fofulo gà pəra, awkà kasləka kà mas à uda gà aw.

³⁸ Ŋgaha Zəzagəla atsalla à uda, av tsəhay à fofulo gesina tsəhay bokuba uwana asal. Kəla fofulo gesina abəza tsəhay vok aŋha.

³⁹ Sləb vok aŋa azlatatak uwana la sifa kà gərgəgər. Vok aŋa azladza kà gərgər la vok aŋa azlatatak fəta, ŋgaha babay vok aŋa azlatatak mahoyay kà gərgər la vok aŋa azlatatak fəta, ŋgaha babay vok aŋa azlatatak mahoyay kà gərgər la aŋa azlakilfi.

⁴⁰ Azlatatak uwana la zagəla la afik la azlauwana la vəďah babay la ahəŋ. Mazləbayaŋ aŋa azlatatak uwana la zagəla kà gərgər la aŋa azlatatak uwana la vəďah babay.

⁴¹ Afats kà la mahəďayaŋ aŋha kokudfa gəl aŋha, təla babay la aŋha, ŋgaha azlatsetsiliŋ babay la aŋatà, ama azlamahəďayaŋ aŋatà kà gərgəgər.

⁴² Kiya uwaga la uwana adapaka vok la azlaməna mawul à uda la mamətsay. Uwana tala kà azinla, ama uwana awul à uda kà azinla aya aw.

⁴³ Uwana talà kà maŋəratata gə ŋgaha mawisiga. La mok uwana adawul à uda kà la ndzəfa ŋgaha la mahəday kaykay.

⁴⁴ Uwana talà kà vok uwana la sləb vok, ama uwana awul à uda, kà vok aŋa Masasəɖok. Baŋa sləb vok aŋa vok la ahəŋ, vok aŋa Masasəɖok la ahəŋ babay.

⁴⁵ Kà uwana wakità Zəzagəla agəɖ kà:

'Adama teraŋa, aga la sifa',[☆]

ama Adama masəla, uwaga kà Kristu, aga Masasəɖok uwana avà sifa.

⁴⁶ Uwana aŋa Masasəɖok la uwana atsa vok à waŋ aw, ama aŋa vok. La lig la ahəŋ aŋa Masasəɖok asa à waŋ.

⁴⁷ Adama matera kà, agə maŋalay gə kà la kiriniŋ aŋa kutso, ama Adama masəla kà, asà à ahəŋ kà la zagəla.

⁴⁸ Azladza aŋa vəɖah kà kalkal bokuba Adama, uwana asa à uda la kiriniŋ aŋa kutso la abà. Azladza aŋa zagəla kà, atà kalkal la dza uwana asà à ahəŋ la afik babay suwaŋ.

⁴⁹ Lagwa kà mədebani à vok la dza uwana taŋəl la kutso, kiya uwaga bay mədebani à vok la dza uwana asà à ahəŋ la zagəla la afik.

⁵⁰ Aganay uwana asa à gi mapəhay azladedə: Tatak uwana taɖfahəŋ la sləb vok, ŋgaha la aŋiz taslala vok aŋa mad à makoray aŋa Zəzagəla aw,

[☆] 15:45 15.45 2Musa 2.7

ngaha vok uwana amətsay babay, aslala vok aña madz à ahəŋ la sifa aw.

⁵¹ Gəpəh à akul nasiri anik: Gesina gami mədà-məts à gay aw, ama mədàgohla vok pəra.

⁵² La katskats, la kirim yewdi, à mok uwana mazlazliŋ adətsənay, haɗay, la mok uwana adətsənay, azlamazimnekiɗ tadəwal à uda kà aña sifa la vok, uwana amətsay aya aw. Ngaha anu uwana la sifa bay mədàbədla vok.

⁵³ Bokuba magoɗay kà, vok gami mamətsay gə uwanay, kà adətsokw vok, uwana à abà amətsay aya aw.

⁵⁴ Baña uwaga adəpaka vok kiya uwanay kà, gay aña masla mapəhal gay ahəl adagəɗ à afik: 'Mamətsay la ahəŋ aya aw, takəɗasl à mamətsay adagay, tsewwa.

⁵⁵ Kak mamətsay aňala ndzəɗa aña uwana la? Kak mamətsay aňala ndzəɗa aña matsəh gi aňak uwana ala?'[☆]

⁵⁶ Ndzəɗa aña mamətsay kà la tsakana la abà, ngaha ndzəɗa aña tsakana kà asa à uda, kà la mapəhay la abà.

⁵⁷ Ama mazləbay aga la Zəzagəla uwana avà à anu maɗuwiŋ la Sufəl gami Yesu Kristu.

⁵⁸ Kiya uwaga zlà, azladedə gay ləv gulo, tsizllàw à ahəŋ lela lela, rəɗ kagoɗaw aw, fəw gəl à sləray aña Sufəl Zəzagəla koksikoksi, kà uwana kasəlaw kà, mabasiŋ aňkul uwana la Sufəl Zəzagəla la abà kà, adətəɗ à vəɗah deyday aw.

[☆] 15:55 15.55 Hosəya 13.14

16

Matsatsàh sili

kà mazlakla azlaməna madiḡal gəl à vok la Urusalima

¹ Lagwa kà, gəzalaḡ à gəl gay ḡuv, lakəl aḡa sili uwana mətsatsàh kà aḡa azladeda gami la Urusalima: Bokuba uwana gəpəh à azlaməna manəfay la kutso Galatiya bay.

² Kəla ladu gesina, delga, kà kəla uwabeyuwi aḡkul afa sili à fəta à awtəy bokuba uwana asla. Dahəwwanḡ à ahəḡ lela tsəràh à uwana gədà à awtəy. Kiya uwaga kà, mədànekudfa aḡa mahamala gay à vok la kaslà uwatà aya aw.

³ Baḡa gədàda à awtəy gədàsləl azladza aḡkul uwana katsatsamawani atà à Urusalima la wak-ità la ahəl, kà madla sili uwana kazlakawla atà.

⁴ Baḡa mazlakay aḡkul kà asla kà gi aḡa maday la gəl gulo kà, mədàday anina pəra zlà.

Manewəḡ aḡa Pol

⁵ Kà maḡəz à slaka aḡkul kà, gədzugw maguway la Makeduniya dadəḡ, kà manəḡ azladeda anik à gay la abatà.

⁶ Zlahaw gədàdzan à ahəḡ la slaka aḡkul ḡodegi la təla awkusa gesina, kiya uwaga kà, kadàzlakaw gi la tatak uwana gənəkudfa aḡha gesina, asa à gi maday.

⁷ Gi kà, asa à gi aḡa madz à ahəḡ la slaka aḡkul, awkà asa à gi aḡa manəḡ akul la tetəvi la ama pəra aw. Gədzugw madz à ahəḡ la tataka aḡkul la abà, à baḡa asa à Zəzagəla.

⁸ Kèla kà, asa à gi madz à ahəŋ la abanay la Efesus tsəràh à mavakay aŋa Pentakosta, ✧

⁹ kà uwana la abanay kà, gəbəzà maslay kà madàh sləray uwana akəs vok. Bə amiyaka azlaməna məzam la ahəŋ aŋuvaw babay.

¹⁰ Baŋa Timotawus adàda à awtày kà, kəsàw masla la ahəl səla, kà masla aŋa madz à ahəŋ la tataka aŋkul la abà kokudfa guba. Kà uwana masla babay masla sləray aŋa Sufəl Zəzagəla bokuba gi.

¹¹ Kamkam, dza apəsew aw, zlakàw tsəràh à uwana adəv mauguzahay aŋha à gay gesina, ŋgaha kà masla aŋa mawul à waŋ à slaka gulo la marabay. Gi, la azladede la abanay kà, məkud mas à waŋ aŋha.

¹² Ama kà aŋa deda gami Apolos kà, gədàdzərədəŋla kaykay, kà masla la azladede anik aŋa mad à awtày à slaka aŋkul, ama asəl mad à awtày lagonay aw, say la huma à gay ŋuv, à baŋa adàbəza kaslà.

Ayyi aŋa makəf gəl à gay

¹³ Kadzewhal aw, dzàw à ahəŋ la adi lela la madiŋal gəl à vok la abà. Gàw maβəlafə la ndzəfa.

¹⁴ Uwana kadfahawwaŋ gesina kadfahawwaŋ kà la masal.

¹⁵ Azladede kasəlaw Estefanas la huɖ gày aŋha. Atà kà azlaməna madiŋal gəl à vok teraŋa la kutso Akayya. Ŋgaha atà tadàh sləray aŋa Sufəl Zəzagəla la ləv tekula, kà mazlak azlaməna madiŋal gəl à vok.

✧ 16:8 16.8 3Musa 23.15-21; 5Musa 16.9-11

¹⁶ Kamkam azladede, gədöv akul kufa, kà akul aña makəs azlaməna sləray uwaga la ahəl səla. Atà la azladza uwana tadāh sləray atà nna kasləkawaw atà.

¹⁷ Gi la marabay mənğa kà mas à wañ aña Estefanas la Fortunatus, ngaha Akayyikus à slaka gulo. Baña gədanəñ atà, kà bokuba akul gesina aṅkul la slaka gulo.

¹⁸ Atà tadukwğəñ ləv à ahəñ, bokuba uwana tadukwakullañ à ahəñ babay. Kəsəw tsəhay dza uwaga la ahəl səla.

¹⁹ Azlaməna madiṅal gəl à vok la makoray aña Asəya gesina ‘Ayyi’, tagodf à akul. Akilas la Pərəskila, la maham à ahəñ məna gay Zəzagəla, uwana tahaməh gay à vok atà nna tadāhakulla ‘Ayyi’, la sləm aña Sufəl gami Yesu.

²⁰ Azladede uwana la abanay gesina tadāhakulla ‘Ayyi’.

Dahàhàw vok ‘Ayyi’, kà akul à akul gesina la mənğa mənğa, ngaha la ahəl səla.

²¹ Aganay uwana gətsetseray la ahəl gulo à gi Pol, ‘Ayyi’, gəgodf à akul.

²² Baña dza awoya Sufəl Yesu aw kà, matsafla gà!

Marana tha, (Asal magodfay: Sufəl gami: Sà à wañ!)

²³ Sufəl Yesu Kristu avà à akul vok mahamay aṅha.

²⁴ Mawoy akul gulo gesina agay koksikoksi la akul, akul uwana la Yesu Kristu la abà.

**Wakità Zəzagəla Wakitə Aŋa Makəs Vok
Slawda Mawga (Cameroun)
Matal: Wakitə Zəzagəla Wakitə Aŋa Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 28 Dec 2024 from source
files dated 29 Jan 2022

03efbf2f-98ca-5534-8610-0be3a8c4b974